



# كلام أبيع جداً

[وبالعامية المصرية]

يوسف معاطي

مكتبتنا



<http://www.maktbtyna2211.com/vb>

دار المصرية اللبنانية




# كلام أبيح جدًا

[وبالعامية المصرية]

- \* الأستاذ يوسف معاطي كاتب ساخر يعرفه قراء الصحف والمجلات .. ويستمتع بأعماله الكوميدية مشاهدو التليفزيون ورواد السينما والمسرح.
- \* وقد أصدرنا له من قبل مجموعة من كتبه في الأدب الساخر، أشهرها: الفن وأهله .. عفاريت .. صابع بالوراثة.. وهي كتب متميزة حازت إقبالاً من القراء في مصر والبلاد العربية.
- \* من أشهر مسرحياته الكوميدية: حب في التخشيبة.. الجميلة والوحشين.. بوببي جارد .. بودي جارد .. بهلول في استانبول .. لا بلاش كده .. وهي مسرحيات ناجحة قام ببطولتها كبار نجوم الكوميديا.
- \* كما كتب العديد من قصص وسيناريوهات الأفلام السينمائية الكوميدية أشهرها: رمضان مبروك أبو العلمين حمودة .. حسن ومرقص .. طباخ الرئيس .. التجربة الدامر كية.. عريس من جهة أمنية.. السفارة في العمارة .. الواد محروس بناء الوزير.. ياتحب ياتقب .. حانحب ونقب.
- \* كما ألف عدداً من المسلسلات الناجحة التي كان لها أثراً كـ مثل: يتربى في عـ مطبـة جـرـير JARIR BOOKSTORE اليوم الأسود .. سـة

في هذا الكتاب يدخل يوسف معاطي، الكاتب الساخر، عُشَّ الدبابير، ويضع يده على الازدواج الأخلاقي الذي تفشى في المجتمع المصري، الذي صارت له حياة سرية يمارسها وحياة علنية يعيشها، يقول كلاماً بالعامية في الشارع والعمل والمنزل، لا يستطيع الكاتب أن يكتبه، ولو كتبه لصادرت الرقابة كتبه أو مقالاته، فصار الازدواج مضاعفاً.. الناس يتحدثون لغة، والكتاب يكتبون بلغة أخرى، حفاظاً على أخلاقيات مجتمع غير أخلاقي أصلاً. ورغم تلك الثورة الأخلاقية على الكلام الأبيح في الفن والصحافة ووسائل الإعلام، لا يوجد أي رد فعل تجاه الأفعال القبيحة المنتشرة في مجتمعنا، ورغم أنها جميراً نتأفف حينما نسمع الكلام الأبيح في فيلم أو مسلسل، فإن له جاذبية خاصة في حياتنا اليومية يا أخي.



MR  
25-11-2009  
Wed  
Riyadh  
مكتبة دار  
الطباعة

# كلام أبيع جداً

[ وبالعامية المصرية ]

تشرشل من  
محمد تقي

يوسف معاطى



# المحتويات

الصفحة	الموضوع
7	- إهداء
9	- مقدمة
17	- الوزير عمل حادثة
29	- بس ما تقولش حيوان
43	- الهرمون ابن الهرمة
57	- علّي صوتك .. علّي صوتك
69	- كلام أبيح
81	- خليها نزية
94	- طويل العمر والبال
104	- لغتنا الجديدة
114	- التواصل مع الشباب
125	- الراجل اللي بيحدف شهال

۲۰۱۹

إلى تلك السيدة التي وقفت على ناصية الحارة .. وفرشت الملاءة  
وهات يا ردح بكلام من اللي قلبك يحبه .. فلم ترك كلمة خارجة إلا  
ولفظتها على قارعة الطريق أمام الرايح والجاي ..

إلى ذلك الولد المبرشم الذي وقف على ناصية الشارع ، وهو يسب ويلعن بأقبح الألفاظ ولم ينج من لسانه أحد من المارة ..

إلى ذلك الرجل الذي طلع الأتوبيس واتهمته امرأة بأنه كان .....  
وشتمته بأقذع الشتائم .. وهو لم يقصر في الرد عليها بأوسع الألفاظ ، ثم  
انتقل منها إلى الركاب - إلينا - ثم إلى السائق .. ثم أنتقل بعد ذلك إلى  
الحكومة والبلد والعيشة واللى عايشينها في انتقالة أدبية ملحة وذكية ..

إلى تلك المرأة التي خلعت شبشبها وانهالت على زوجها في الشارع بالسباب بكلمات تعبّر عن أخص خصوصيات العلاقة بينهما ..

إلى ذلك السائق الذي فتح باب التاكسي وخرج للراكب وفي يده مفتاح حديدي وانهال عليه بشتائم متقطعة .. لأنه اعترض على الأجرة ..

إلى ذلك المواطن الذي "اخنق" من هذا الموظف الروتيني .. وقد صوابه .. وأخرج من فمه صفيحة زبالة ألقى بها عليه ..

إلى كل لسان زفر .. إلى هؤلاء الذين يستخدمون أنوفهم  
وأصابعهم ولغة أجسادهم .. في التعبير البذئ عن الإحساس  
بالخنقة..

إلى كل هؤلاء المخنوقين .. السفلة .. المنحطين ..

أهدى هذا الكتاب .

فمن وحدهم .. كتبت هذا الكتاب .. محاولاً أن أعبر بالأدب عن  
قلة الأدب ..

يوسف معاطي



## مقدمة [ابد منها]

ولا مؤاخذة يعني ...

حدث هذا منذ حوالي عشرين عاماً ...

كنت عند السيد حمدي سرور مدير الرقابة في مكتبه .. وكان سبب الزيارة أنهم رفضوا لي فيلماً .. وكان سبب رفضهم أن الفيلم به كثير من الأباحة وقلة الحيا .. جلست معهم محاولاً أن أخفف بعض الشيء من سفالتي مساوياً للحفاظ على مشاهد نظير التضاحية بمشاهد أخرى ..

قال لي الأستاذ حمدي سرور .. ده الرجال لما البطلة حضرته بيقول لها العمه ورمت .. يقصد إيه بالعمه ورمت ؟

فعلاً .. الرجال عنده حق .. امرأة تختضن رجلاً فلماذا تتورم العممة التي يرتديها ؟!

وفيجاًة بينما نحن نتصارع على بعض الجمل .. وبعض المشاهد .. دخل يوسف شاهين مستاءً من فعل ك طفل أخذوا منه لعبته .. وقال حمدي سرور

بوظولي الفيلم .. أنا .. أنا .. أحسن لي أسيب البلد دي خالص .

ابتسم حمدي سرور وقال له أقعد يا جو .. أقعد بس .. زعلان ليه ؟



قال يوسف شاهين شاكياً .. موجهاً كلامه لي برغم أنه لا يعرفني  
- تصور حضرتك .. شالولي الشخرة في الفيلم !! البطل بيشرخ  
ومفيش أي حاجة ممكن يعملها غير أنه يشرخ .. يرضيك إنهم يشيلوا  
الشخرة ؟

وتركت مكتب مدير الرقابة وأنا أفكر ..

ما الذي يجعل الشخرة شيئاً قبيحاً ؟!. إنها صوت يصدر من الأنف  
والفم معًا ، ينم عن استهجان الشاخر لما يسمع أو لما يرى .. حالة من  
حالات التعبير الإنساني يُقال إنها موطنها الأصلي الإسكندرية ثم  
صارت سائدة في القطر المصري كله .

ثم نحن ن Shr ونحن نائمين .. وتجيزها الرقابة .. فما الذي يجعلها  
تحذفها ونحن مستيقظون ؟!. فهل هي قلة أدب وأنت صاحي ..  
وشيء عادي مهذب طالما أنت نائم ؟!!.

تصرفات أخرى يفعلها البعض بالأذرع والأصابع .. مرفوضة  
طبعاً .. لكنها ليس لها أي معانٍ واضحة غير أنها تصرفات قليلة  
الأدب بس !!.

أما بالنسبة للألفاظ .. فهناك ألفاظ ممنوعة تماماً .. رغم أن معانيها  
تجيزها الرقابة ، فمثلاً كلمة (عاهرة) .. أنت تتقبلها عادي ، ولا تقبل  
نفس المعنى إذا قيل بالعامية المصرية .



وعندك كلمة "اللباس" أنت تتقبلها في مسلسل تاريخي بالفصحي ولا تقبلها بالعامية وانتوا فاهمين ليه طبعاً .. إذا شاهدت فيلمًا أجنبياً يمكن أن تقرأ على الشاشة في الترجمة .. المرأة الجميلة تقول لحبيها في السرير أريدك أن تصاغعني .. وطبعاً هذه ترجمة خاطئة .. فهي لم تقل له ذلك باللغة العربية الفصحي ولا الإنجليزية الفصحي .. عشان ده مش وقت اختيار الألفاظ ولا التعبيرات الأدبية .. فالموقف نفسه ليس به أدب !

تزعل الرقابة إذا قال أحدهم عن امرأة جميلة تمر أمام المقهى .. (المرة) دي حلوه قوي ، وتنصحك باستخدام كلمة (الست) برغم أن الست هي المرة ولا يوجد أي فارق بينهما ، ولذا اخترع الشباب كلمه (المُزة) وهي حل وسط بين الست والمرة .

ورغم تلك الثورة الأخلاقية على كل الكلام الأبيح في الفن والصحافة ووسائل الإعلام ، لا يوجد أي رد فعل تجاه الأفعال القبيحة فعلاً المنتشرة في مجتمعنا .

فأنت يمكن أن تسمح لي بأن أكلمك عن (عاهرة تمارس الرزيلة في بيت دعارة) هل لاحظتم أسلوبي في الجملة السابقة وتعبيراتي الأدبية الرفيعة .. برغم أن المعاني حقيرة . ولكنكم تقبلونها .. هل تسمحواالي الآن أن أكرر الجملة نفسها بالعامية !! طبعاً لا .. أنت طبعاً نفسك أقوها بالعامية .. لكن بعينك .. أنت عاوز تقرأ وتبسط وتتكيف وأنا ألاقي

مباحث الآداب فوق دماغي تاني يوم .. وأنا يعني يوم ما اتمسك آداب ..  
اتمسك في كتاب مش جايب همه .. طيب اتمسك في شقة ولا حاجة !!

ولا تنكروا أن الكلام الأبيح رغم أنها جمِيعاً تتألف حينها نقرأه أو  
نسمعه في فيلم أو مسلسل .. إلَّا أن له يا أخي جاذبية خاصة في حياتنا  
اليومية .

فهناك ألفاظ أبیحة .. لا يمكن أن تجد لها مرادفاً مؤدباً ، يعبر عن نفس الحالة التي تشعر بها وأنت تقولها في موقف ما .. فكلمة منافق مثلاً حينما تود أن تصف بها أحدهم تبدو باهتة ولا تفي بالمعنى إذا قورنت بكلمة..... أو (حتى لا يمنع الكتاب من النشر) لنقلها بالفصحي (قواد) ثم ألم تقابل أشخاصاً في حياتك تود أن تقول لهم بملء الفم ..... أترك النقاط السابقة لحصيلتك اللغوية فيما يختص بقاموس الأباحة ، ولنفرض أنك مررت بأحدهم ووجده حاطط روج .. وبيموضع لبانه وينظر نحوك تلك النظارات التي لا شك أنها تضايقك ، طالما أنك راجل بتاع نسوان (عذرًا بتاع سيدات) ومالكش في الأشكال دي بالتأكيد ستصرخ فيه .. ما تسترجل ياله.. أنت ..... طبعاً لا أستطيع أن أكتبها .. برغم أنني واثق أنك تستطيع أن تملأ النقاط بالألفاظ المناسبة ، ولذا قدر الكاتب أن يظل يبحث عن ألفاظ لا نستخدمها ليعبر بها عن ألفاظ نستعملها ، ولكنها ألفاظ ممنوعة .. ولماذا هي ممنوعة ؟ لأنها أبیحة .. وليس ألفاظ التي تحمل معانٍ



جنسية هي فقط الممنوعة ، بل إنني إذا أردت أن أجعل بطي لي يدخل الحمام (ليتبول) مثلاً .. لاحظوا الفظة (ليتبول) أعتقد أنها لا تستخدم إطلاقاً في حوارنا إليومي وهذا أنا أستخدمها هنا .. لماذا ؟ لأنني لا أستطيع أن أستخدم التعبير الشائع الذي نستخدمه .

قالو إن أحد مهام الكاتب أن يرتقي بتعبير الناس وبلغتهم .. يا سيدى ماشي ، إنما المشكلة من قال إن هذه التعبيرات الأبيحة .. أبيحة فعلًا ؟ وحينما نصف امرأة جميلة .. فإن اللغة العربية تسمح لنا بأن نصف ما نشاء طالما أن مختار الصحاح موافق .. أستطيع أن أصف صدر المرأة وساقيها وخصرها ولون بشرتها .. ولكن هل يمكن أن تصف هذا بالعامية التي نستخدمها فعلًا ؟ ! مستحيل .. فالصدر له الكلمة شائعة .. لو كتبتها الآن .. أروح في داهية .. مقبول أن نقول مثلاً .. النهدان أو الثديان .. الساقان أيضًا لها الكلمة شائعة .. من الممنوعات أيضًا إذا أردت أقول الأرداف أو الأعجاز ماشي .. أما الكلمة الشائعة إياها لا يمكن ، ربما يكون مسموحًا لي أن أقول مثلاً .. أحب وراك الفرخة .. فتأتي هنا الفرخة لتنقذني من الرقابة على المصنفات .

مشكلة الكلام العامي .. أنه الكلام الذي اختاره الناس بديمقراطية لغوية تامة .. فإذا قلنا مثلاً ونحن نصف البطل وهو يقبل البطلة .. (وراح داخل بوزه على شفافيهما لحد ما قطعهما من البوس وهاج عليها ..) طبعًا .. هذا الكلام أصابكم باستياء الآن لأنكم كتم

تودون أن أقول (وغابا في قبلة طويلة فأثارت مشاعره تجاهها) طيب  
والنتيجة؟ ما هي واحدة.

ولذا فانا حينما فكرت أن أقدم لكم كتاباً بالعامية ، أردت أن أترك  
لنفسى ولكم حرية كاملة في اختيار الألفاظ .. وقد لاحظت مثلاً أن  
ابن إياس في كتابه الشهير (بدائع الزهور في وقائع الدهور) لجأ كثيراً  
إلى الألفاظ العامية البسيطة حتى يستطيع أن يعبر بوضوح وبسرعة عما  
يريد أن يقوله .. ده راجل مؤرخ مش فاضي بأه يدور على الألفاظ  
والعبارات .

وفي كتاب ألف ليلة وليلة كثير من التعبارات الأبيحة التي لجأ إليها  
كاتبها ولم يجد لها بديلاً آخر ، ولذا فانا أوجه كتابي هذا لهؤلاء الذين  
يريدون أن يروا الأشياء كما هي .. دون خداع لغوی ولا لف  
ولا دوران .. ولقد اخترت أن أكتب هذا الكتاب بالعامية المصرية لأنها  
اللهجة المفهومة في كل الوطن العربي .. ولم أشأ أن أستخدم لهجات  
أخرى لأننا كُنا سنقع في مشاكل أكبر .. فاللهجات العامية العربية بها  
كثير من الألفاظ التي تعني هناك شيئاً .. وتعني هنا شيئاً آخر .

وقد سألني أحدهم حيث كنت في تونس منذ سنوات عديدة ذلك  
السؤال الذي أصابني بالخرس .. والدهشة !

- أستاذ يوسف .. حضرتك معَرِّس؟



إن الكلمة معرس عندنا لها دلالات أخرى لا يمكن أن يقبلها واحد  
زيبي .. قلت له بجفاء .

- لاً طبعاً أنت إيه اللي بتقوله ده ما تحترم نفسك.

أجاب ببراءة

- عديت الخمسة وتللاتين سنة ولسه مش معرس؟

قلت له

- هو لازم بدرى كده؟!!


وعلمت طبعاً أن معرس تعنى متزوج .. وفي تونس أيضاً ..  
يقولون شد العبوص .. وتعنى أن تقف في الطابور ، يقولونها في  
تونس بلا أي إحساس بالحياة ، يبأه الكلمة مش قليلة الأدب .. احنا  
اللي مخنا بيروح ناحية قلة الأدب و كنت بالشام رايح أتغدى وإذا  
بالجرسون يقترب مني ويقول لي .

- عندي واحد (حراق بأصبعه) أنجيبيه؟!

وكدت أن أمسك فيه ، وإذا بالحراق بإصبعه هذا ما هو إلا أكلة  
عدس سورية بالبصل والتوم .

وفي لبنان أقرب مني أحدهم وقال لي :

- فشخه لو سمحت؟!



يا نهار أسود!! ماذا يظن هذا السافل بي .. وإذا بالفشنخة هي خطوة.. يريدي أن أخطوها .. واعتذر لـه .. أصل أنا من مصر معلش .. قال لي أهلاً فيك ؟!. ماذا يقصد بكلمة فيك ؟!

وأخيرًا أحب أن أحبط هؤلاء الذين اشتروا كتابي لكي يقرأوا فيه كلامًا أبيحًا من الذي يحبون أن يسمعوه في الشوارع وعلى النواصي ، وأقول لهم إن الألفاظ التي سيقرأونها في الكتاب ليست ألفاظًا قبيحة.. وإنما المشاهد التي سيقرأونها .. والمعانٍ التي بها .. هي مشاهد ومعانٍ .. قمة في الأباحة .

تم التحميل  
مكتبة

مكتبة

WWW.MAKHTOBAT.COM

بيت الكتب



## الوزير عمل حادثه !!

الدنيا انقلبت في الوزارة وحالة هلع وذعر بأت في كل المكاتب ، بعد ما عرفوا الخبر .. بأه عم بسيوني الساعي يجري بين المكاتب والأستاذ فتحي مدير الشئون القانونية ساب القهوة اللي في إيده ، وربط كرافته وجرى على مكتب الوكيل .. اللي يشرف منظر الموظفين وهم بيجرروا ومايعرفش اللي حصل يقول ده زلزال .. يا إما حرقة في الوزارة .. ما هي الزلازل والحرائق شغالة على ودنه اليومين دول ..

الخبر انتشر في الوزارة زي النار لما تمسك في كوم قش .. وبرغم كده محدش كان قادر يقوله .. ينطقه ! باختصار اللي حصل ولو إنها مش عاوزة تيجي على لسانى .. معالي الوزير عمل حادثة وهو جاي الوزارة !! يا نهار اسود ! . مين ابن المجنونة اللي أنشك في نواضره وخط معاليه ؟!

الحكاية إن الموكب بتاع معاليه كان ماشي .. وعربية كارو ما تعرفش كانت جاية من أيها داهية كانت معدية في شارع المبتديان ، في نفس الوقت اللي عربية الوزير كانت بتحود .. والعربجي حاول بكل

جهده إنه يوقف الحمار .. إنما طبعاً إنه حمار مقدّر ش خطورة الموضوع ، وراح رافس العربيجي صاحبه لأنه كان مخنوق منه عشان نازل فيه ضرب ليل نهار .. وراح جارر العربية الكارو وداخل في عربية الوزير كدهوه خبط لزق ..

النهاية .. الحمار اتعور ، والعربيجي خدوه القسم بيسلب دم ومعالي الوزير اتشاءم ورجع البيت وما راحش الوزاره في اليوم ده .. كل الموظفين في الوزارة كانوا مشغولين بالموضوع ، وطبعاً الناس اللي كان لها مصالح جاية تقضيها في الوزارة في اليوم ده مصالحهم اتأجلت لتناني يوم .. وقال إيه ماشيين بيرطموا وزعلانين .. يا أخي الشعب ده صحيح يخاف ما يختشيش .. الولية واقفة تعيط ومش عاوزة تمشي ومفيش على بُقها غير إيه؟ معاش جوزي .. عاوزة أصرف المعاش .. يا أمي .. الوزير عمل حادثه .. يا حاجة معاليه عمل حادثه .. ما بتفهمش هوه معاش جوزي وعلقت على كده .. طيب جوزك الله يرحمه .. وتقدرني تلاقي غيره يتجوزك ويأنيكي .. والعياال تقدرني تخلفي أورطة تانية زيه .. إنما ده وزيرنا .. لو لا قدر الله حصل له حاجة .. نجيب وزير تاني منين ؟ !.

افهمي .. افهمي .. امشي دلوقت وتعالي يوم الأحد ..

دخل علينا الأستاذ إبراهيم حداد رئيس شئون العاملين .. كان جاي متأخر وخايف الوكيل يقول له أتأخرت ليه .. وخصم يوم

وال حاجات إياها دي .. إنما حضرة الوكيل كان في وادي تاني .. هوه في إيه ولا في إيه ..

- إيه اللي حصل يا حضرة الوكيل ؟

- معاليه عمل حادثه !

راح خابط الأستاذ إبراهيم على دماغه كأن الوزير يأه أمه .

- يا نهار اسود .. عمل حادثة .. وهوه فين ؟

رد عليه السيد الوكيل بصوت متقطع من الحزن .

- أكيد في المستشفى .

انتهزها الأستاذ إبراهيم حداد فرصة عشان يزوغ .. وراح قايل بصوت عالي قدام كل الموظفين .

- واحنا ح نفضل قاعدين هنا حاطين إيدينا على خدنا .. لازم نزوره .. نطمئن عليه .

الأستاذة أمينة عبد القوي اللي ماسكة الحسابات .. قامت صلت ركعتين ودعت لمعاليه أنه يخرج من الأزمة دي على خير .. وقعدت ماسكة المصحف .. والآنسة ميرفت سكرتيرة معاليه .. دخلت أوصيتها وقفلت على نفسها وانهارت في العياط .. والأستاذ وائل اللي لسه متعين جديـد كـتم ابتسامة خبيثة كده وهو بيـص للـأـسـتـاذـ أـشـرف .. أـصـلـ فـيـهـ كـلامـ إـنـ الـآـنـسـةـ مـيـرـفـتـ بـتـحـبـ مـعـالـيـهـ وـعـالـهـ تـرـفـضـ فـيـ

عرسان عشان خاطره .. ومرة جات المدام مرات معالي الوزير تزوره في الوزارة .. وبصت لها بصرة جابتها من فوق تحت .. ودخلت قعدت مع معاليه خمس دقائق كان صوتها جايب ميدان التحرير وراحت واحدة شنطتها وماشية ..

بالنسبة للموظفين الرجاله بأه .. بدأت بينهم مباراة في الفتاوي .. كان كل واحد بيحاول يبين نفسه قريب من معالي الوزير أكثر من غيره.

بخصوص اللي حصل .. ده واحد كان بيسأل ..

- الحادثة يعني .. حادثة جامدة ؟

رد السيد الوكيل ..

- طبعاً حادثة شنيعة !؟.

وراح الأستاذ إبراهيم حداد قايل ..

- يا جماعة أنا أكاد أجزم إن دي عملية مدبرة .

راح الوكيل معللي عليه هوه راخر .. وقال ..

- غالباً هي قوى أجنبية اللي مدبرة الحادث .. معالي الوزير بيتمتع بشعبية وحب من الناس منقطع النظير .. العملية دي جاية من بره ..

واتسحب الأستاذ وائل من لسانه .. ما هو الشباب دول ليهم

أسئلة تقرف الكلب قال إيه ..

- ما ترسونا على بري يا جماعه الوزير دلوقت في البيت ولا في المستشفى؟

آدي بقى عيب الشباب عاوز يخلص .. ويحسم كل حاجة في ثانية ..  
ما القعدة حلوه وكلنا ملمومين في مكتب الوكيل ومشينا الناس ..  
وقاددين.

راح الوكيل رادد عليه بقرف وقايل له ..

- الوزير في البيت .. ما تقلقوش ..

يقوم الواد أشرف زميله .. يسأل ..

- وما راحش المستشفى ليه يطمن على نفسه أحسن يكون فيه حاجة .. الحاجات دي أصلها ما بتبانش علطول .. أنا مرة عملت حادثة ورجل انسكرت ما حسيتش إلا تاني يوم .

راح صارخ فيه الأستاذ إبراهيم حداد ..

- تف من بُقك .. ما تفولش على معالي الوزير وأنت ح تجيب حادثتك أنت زي حادثة معالي الوزير؟! وبعددين كل اللي بيتعمل في المستشفى معمول دلوقت في بيت معاليه ..

\* \* \*

بعد الحادثة .. كل حاجة تقريباً وقفت في الوزارة .. محدثش قدر يقول.



- (خلاص بأه يا جماعة كل واحد يروح على شغله).

ولا حتى السيد الوكيل قدر يقولها .. لأن جملة زي دي لو اتقالت  
ح تتفهم غلط .. ولو إتنقلت بعد كده لمعالي الوزير ممكن تودي في  
داهية .. ووقف كل موظفين الوزارة قصاد بعض كأنهم يمثلوا  
مسرحيه وكل واحد خايف ينكشف قدام الثاني ..

\* \* \*

بعد مرحلة الصدمة ما خلصت وردود الأفعال كلها اتعلمت ..  
كان لازم نحرك الأحداث شوية .. لما وصل الأستاذ محمود سليم  
مدير مكتب سيادة الوزير .. دخل بغموض .. لا باین عليه مبسوط  
ولا متضايق .. وده راجل بأه خبير في إظهار المشاعر المناسبة في  
الوقت المناسب .. أصله ح ينبط ليه .. ده الوزير عمل حادثة .. وح  
يتضايق ليه .. الوزير ما جرالوش حاجة .. وقف الأستاذ محمود  
سليم في وسط الموظفين .. وراح رافع سماعة التليفون وطلب  
معاليه.

- آلو .. حمد الله على سلامه معاليك يا فندم ..

كل اللي واقفين قعدوا يتصوّل للأستاذ محمود .. ودموعهم على  
خدتهم علشان يوحوله بالكلام اللي يقوله معاليه .. خدم من وشوشهم

وراح مكمل.

- إحنا اتأثّرنا جدًا يا فندم .. والله سمعنا الخبر من هنا وحالنا  
شلل .. ما بأيناش عارفين نعمل إيه؟ رجالة سعادتك هنا حالتهم  
يرثى لها عاوزين يسلمو على سعادتك .

وبخبرة وحنكة محصلوش .. راح مدي السماعة لـ الآنسة ميرفت .

يقوم الأستاذ وائل غامز بعينه اللي يندب فيها رصاص للواد  
أشرف .. آه لو كان لمحهم الأستاذ محمود سليم .. كان بأه نهارهم  
كوبيا .

الآنسة ميرفت مسكت السماعة و .. مقدرتش تمسك نفسها  
وراحت منفجرة في العياط .

راح الأستاذ محمود سليم واخد السماعة .. والكل مادد إيده ونفسه  
بس يثبت وجوده .. يسلم عليه .. ناس كتير قوي حياتها كلها فرقت  
بمكالمة زي دي .. وقال له الأستاذ محمود ..

- معلش يا فندم .. مش قادرین يسيطرؤ على مشاعرهم .. الوزارة  
كلها اخضت على سعادتك .. المهم سيادتك مش تحتاج حاجة .. أي  
حاجة.. إحنا كلنا ولادك وخدامينك يا باشا .

السيد الوكيل مد إيده .. ومات على السماعة .. محمود سليم  
اتضايق .. إنها محبس يعمل عداوة مع الوكيل .

- السيد الوكيل معاك يا فندم .



- آلو .. (وراح معيط هو كمان) .. والله يا فندم ما تتصور معاليك أنا حصل لي إيه أول ما سمعت صوتك .. الحمد لله .. الحمد لله .. إنما إيه يا باشا اللي حصل بالظبط .. إحنا عارفين إن سعادتك مستهدف لمواقفك الوطنية .. مين الخاين العميل اللي تجرأ وعمل كده؟! فيه ناس بتتهم الموساد بأنه هو اللي عمل كده .. أرجوك يا فندم .. إنت حياتك بالنسبة لنا أغلي من حياة أولادنا والله العظيم .

\* \* \*

معالي الوزير ما كانش عارف يقول إيه لما سمع الكلام الكبير ده ..  
ح يقول ده حمار خبطني وعربجي وعربية كارو .. شكلها برضة مش  
لطيف .. إنما رد بدبلوماسية وبلطف مصطنع من بتاع الوزرا ده وقال  
له ..

- ما تكبروش الموضوع يا حلمي .. أنا كوييس .. مفيش حاجة ..  
وطمن الناس كلها.

وراح باصص حواليه وتأكد إن المدام مش جنبه وقال له ..

- وقول لميرفت تمسك نفسها شوية .. أنا كوييس .. أنا زي الحديد .

السيد الوكيل فرح قوي لما الوزير خصه هو بالذات .. بالمهمة  
دي .. وقال لميرفت :

- عاوزك يا ميرفت .

وأخذها على جنب وقال لها ..

- أمسكي نفسك شوية .. معاليه بيقولك هو زي الحديد .

\* \* \*

في بيت الوزير بأه .. التليفون ما بطلش .

- آلو .. أنا من جريدة الرأي الآخر .. وعاوزين نعرف الحقيقة يا معالي الوزير .. هل هي قنبلة أقيمت على موكب سيادتك .. أم طلق ناري .. أم مختل عقليا حاول اقتحام الموكب ؟!

طيب الوزير يرد يقول إيه بأه .. دخلت في حمار .. ولا حمار دخل فيها !.

إنما طبعاً لازم يرد رد غامض ما يديش أي معلومة .

- والله ما عنديش فكرة مؤكدة .

- هل حضرتك بتتهم أي تيار من التيارات المعادية لسياسة سيادتك في الوزارة .

- الأجهزة الأمنية عموماً بتعمل تحرياتها بخصوص الموضوع .

قال الوزير (وهو بيسترجع لحظة دخول الحمار عليه في الحادثة ..

لما دخل بدماغه في الشباك وقعد ينهق ..) ردًا على سؤال من قناة



- أنا مدرس أحده بالضبط ملامح مرتكب الحادث .. لا .. ملامحه غريبة جدًا .. كان لابس لجام قصدي كمامه .. أعتقد أنه من جبهة الرفس ..

- نعم يا فندم من جبهة الرفس؟!.

- أيوه .. تمام .. تمام ..

\* \* \*

بالليل كل الموظفين كانوا في بيت معاليه .. بيطمنوا على صحته .. أصل زيارة الوزير واجب .. أنت ممكن تزوج أسبوع من الشغل ومحدش يحس بيك .. إنما في ظرف زي ده .. ما تروحش .. يأه أنت ناوي على قطع عيشك.

بدأت بعض الكاميرات من القنوات الفضائية تيجي على بيت الوزير عشان تسجل معااه .. ما هي القنوات كترت ولازم تتملي بشرابيط أمال ح يذيعوا إيه يعني؟

وزير عمل حادثة ..!. مش وحشة .. الناس تحب تشفوف ده ..

أكثر من 30 كاميرا في البيت بيسجلوا .. والوزير قاعد قدام

المذيعات ساند على كرسي وعامل تعان شوية .. وقال ..

- الحقيقة دي مظاهره حب أنا مش قادر أعبر عن سعادتي بيها ..



الريبيشن اتملا .. وأوضة السفرة .. والناس عماله تيجي .. الكل عاوز يطمئن ويمضي حضور .. حطوا كراسي في الجنينة وعلى السالم وفي التراس.

والوزير بعد ما كان بيمثل أنه تعبان .. بأه فعلًا مش قادر يصلب طوله .. جابوله كرسى قعد عليه .. بأه يسلم على الناس وهو قاعد .. بعد شوية جابوله ملأية حطوها على رجليه .. ومخدة ورا ضهره .

ما هو مش معقول كل الناس دي جاياله عشان تعبان وخارج من حادثة يلاقوه زى الفل ورایح جاي قدامهم .

الساعة جات 12 بالليل .. راح الأستاذ محمود سليم مزعق ..  
وقال ..

- يا جماعة .. أرجوكم .. نسيب معالي الوزير يرتاح شوية .

تاني يوم كان الخبر في الصفحة الأولى في كل الجرائد ..

(نجاة معالي الوزير من محاولة اغتيال)

وطبعًا ما كانش ينفع معالي الوزير يروح تاني يوم الوزارة .. الحكاية لازم تكمل صح .. هوه اغتيال كرتون؟! لازم فيه فترة نقاهة .. دكتور الوزارة كتب له أجازة 15 يوم مرضي .. وفيه جرائد قالت إنه ح يعمل عملية خطيرة .. وجرائد تانية قالت إنه لازم يسافر بره ..

والوحيدة طبعاً اللي كانت متأكدة إن معاليه زي الحديد هي الآنسة ميرفت.

\* \* \*

أنا آسف .. الحقيقة أنا كاتب فاشل .. مشيت في القصة مع خط الوزير ونسيت خطين في منتهي الأهمية للدrama بتاعة الحكاية .. خط الحمار .. وخط العربي

بالنسبة للعربي فهو لا يزال متحفظ عليه للتأكد من أنه ليس له أي نشاط سياسي . وبالنسبة للحمار .. تعيشوا انتوا بأه .

\* \* \*

آسف مرة تانية .. فيه شخصية اتنست برضه .. بس مش أنا لوحدي اللي نسيتها .. انتو كمان نسيتوها .. الست اللي كانت جاية تصرف معاش المرحوم جوزها .. أيوه .. الولية اللثاثة دي .. عموماً هي لسه ما صرفتش المعاش لحد دلوقت ، وكل يوم تيجي الوزارة تطلع الملاية وتنزل ردع بكلام أبيع من اللي قلبك يحبه .



## • بس مانقولش حيوان •

بتحصل لي كتير الحكاية دي .. أباه ماشي في الشارع سرحان  
لا عارف أنا رايح فين ولا عندي اتجاه محدد .. وفجأة .. ألاقي نفسي  
في مكان غريب .. أبص حواليا .. أنا فين؟! أنا إيه اللي جابني هنا؟!  
هوه أنا كنت رايح فين؟! تطلع إيه المنطقة دي؟! ح أرجع إزاي؟! آدي  
آخرة إن الواحد يمشي برجليه مش بدماغه .. الحارة دي أنا أول مرة  
أجيها في حياتي .. أنا عاوز أطلع على الشارع .. نجرب كده نخش  
يمين .. لا .. ده زقاق ضيق .. نخش شمال ! دي عطفة .. يiae نرجع  
باء .. أصل هنا أحسن ما تسائلش حد.. الناس شكلها ضارب حاجة  
ولو عرفوا إنى غريب ح يقلبوبي .. الراجل اللي واقف على ناصية  
الحارة وواحد بشله في وشه بييص لي كده ليه؟! هوه أنا فيها حاجة  
غريبة .. إيه ده .. أنا لابس بدلة سموكتنج وبابيون وجزمة فرنية  
بتلمع .. هنا ..! إيه اللي جابك هنا بالمنظر ده يا حيوان ..! ده أنا بقول  
لنفسى .. يiae نمد شوية عشان نطلع من هنا على خير .. المنطقة دي  
عاملة زي بيت جحا ماهاش مخرج .. وأنا عمال أغوط في الطين  
بحزمتي وبدلتي .. بصراحة نظرات اللي حواليا ما تطمئنش .. أصل



الرجال أبو بشرة ماشي ورايا .. وبغمز لواحد تاني واحد سكينة في  
 قورته .. بصل لي هوه كمان نفس البصمة المزعجة .. أنا لازم أبطل  
 السرحان ده وأنا ماشي .. ح أطلع من هنا إزاي بس ؟! لو عاوزين  
 الساعة ياخدوها .. والموبایل كمان .. بس يسيبوني أمشي .. مفيش غير  
 فرصة واحدة .. إني أطلع أجري لحد الفتحه اللي في آخر الحارة .. والله  
 ربنا كان كاتب لي وتبأه منفده على الشارع نباء خرجنا .. والله طلعت  
 مسدوده يباء ده قدربي بآه .. ياخدوا اللي هما عاوزينه.. بس بلاش  
 العنف .. مشكلة الصيع والحرامية إنهم ما يعرفوش إحساس واحد  
 جبان ماشي في شارع ضلمه .. ومش عارف يخرج .. لازم يعرفوا إني  
 معنديش أي رغبة في المقاومة .. عاوزين أي حاجة ياخدوها .. بس  
 يسيبوا البنطلون .. آه .. الحارة طلعت مسدودة .. مفيش غير حل  
 واحد عشان أخرج من الورطة دي .. الحارة ورايا سد واتنين داخلين  
 عليا واحد ماسك مطواه .. والتاني ماسك سنجه .. يباء إيه الحل ؟

الحل بسيط جدًا .. إني أطلع بحلم في الآخر .. وإن كل ده حلم ..  
 ده المبر الرئاسي الوحيد اللي يخليني قاعد باكتب لكم وباحكي لكم  
 دلوقت .. ما هم لو كانوا قربوا أكثر من كده وأنا ما كنتش بحلم كان  
 زمانهم هما اللي بيكتبوا الحكاية دي مش أنا ، وأكيد أسلوبهم كان ح  
 مختلف ووجهة نظرهم في الموضوع كانت ح تختلف .



يباء ما دام أنا اللي بحكي دلوقت يباء أنا كنت بحلم .. إيه يا جماعه .. أصحوا معانا شوية .

أمبارح بأه حلمت حلم عجيب جداً .. لقيت نفسي ماشي لوحدي برضه .. بس المرة دي في غابة .. أصلی قبل ما أنام كنت باتفرج على قناة ديسكوفري وزي ما تقول عسلت وأناع الكنبة لقيت نفسي ماشي بين الأدغال والأحراس ، ولأنني حاسس إني بحلم كان جوايا اطمئنان عجيب ، لأن تعاملني مع أيأسد أو نمر ح يكون في حدود الحلم ومش حيزيد على كده .. لوحدي تماماً .. في الغابة ومفيش أثر لأيبني آدم .. إيه اللي جابني هنا ؟ وح أرجع إزاي ؟ هيه الحلة دي فيها مواصلات ؟! كل دي أسئلة ما شغلتنيش على الإطلاق .. أنا راجل بحلم وأكيد ح أصحى .. ألاقي نفسي ع الكنبة .. إمتى ؟ مش مهم .. ساعات مثلاً دراعك يقوم مدلدل لوحده كده ، وأنت نايم تقوم صاحي ، أو تكون جاي تقلب تقوم تقع منع الكنبة أو التليفزيون يوش .. يباء خلينا ماشين في الغابة .. نشم شوية هوا .. وشوية ولقيت قطيع من الغزلان البرية .. واقفين بعيد .. المنظر كان بديع بصراحة .. كان نفسي آخذ لهم صورة .. بس للأسف معيش كاميرا وحتى لو معايا .. ما أنا ح أصحى بعد شوية لا ح ألاقي الصورة ولا الكاميرا .. قربت منهم وأنا بالألعابهم .. يا غزال .. يا غزال .. العشق حلال .. أول ما شافوني .. الغزلان يعني .. قعدوا يصرخوا .. ويجروا كأنهم شافوا ديناصور قدامهم .. وسمعتهم

بيقولوا .. (آه .. ما هي الغزلان بتتكلم في الحلم عادي) .. كانوا  
بيصرخوا وبيشاورا عليها ..

- الحقوا ..بني آدم ..بني آدم .. اهربوا ..  
.. معقوله !! للدرجة دي أنا مخيف .. أنا عملت إيه .. ده أنا  
بأغني .. هل صوتي وحش للدرجة دي؟! وشوية .. ولقيت دبة  
خرجت من ورا شجرة ومعها أربع دبب .. بصت لي برصه مرعبة ..  
وقالت ..

- أهوه .. المنحط ده هو اللي ضرب ابني بالرصاص .. وخطف  
اخواتي وسجنهما في جنينة الحيوانات .

أنا ! يا دبدوبة يا حبيبتي .. والله العظيم ما أنا .. أكيد حد تاني ..  
استني بس .. وأخذت الدبه الدباديب الأربعة اللي معها وجريوا من  
قدامي .. ونط قرد من شجره لشجره وقعد ينادي على قراييه .. القرود  
اتلمنت .. وراح واقف القرد وقعد يخطب في القرود .

- أهوه اللي خطف عيالي ورماهم في الجبلية عشان يقعدوا هو  
واللي زيه يضحكوا علينا ويرمولنا قشر لب وفول سوداني .

- يا عم قرد أنت ح ترمي بلاك عليا .. طيب والنعمة الشريفة ..  
وقبل ما أكمل .. لقيت تعلب وقف من بعيد بيصل لي بغل .. هو  
وكام تعلب واقفين وراه .. ويبيقول لي ..



- بآه أنا اللي خبيث ومكار يا ميه من تحت تبن .. استعبط ياروح  
أمك برعئ قوي سيادتك .. هه !!. فين أبويا ياله .. وديت أبويا فين ؟

- وأنا مالي بابوك يا عم تعلب .. أنا لا شفت أبوك ولا قابلته .

- آه .. مش أنت اللي سلخته يابني آدم .. ورايح تعمل بيها فرو  
تقدمه هديه للمدام .. بآه أبويا أبو التعالب اللي الغابة كانت تعمل له  
ألف حساب .. آخرتها مراتك لابساه ورايحين تسهروا في ليلة رأس  
السنة .. استنى عليا .. نهارك مش معدى ..

وبدأت الحيوانات تنادي على بعضها .. أهوه .. امسکوه .. اقپضوا  
عليه .. أوعى يفلت منکوا .. وفجأة الغابة اللي ما كانش فيها صريح بن  
يومين لقيتها كلها بتجري ورايا ، أخذت ديلي في سناني ويا فكيك ..  
الغابة دي بیخرجوا منها إزاي ؟ فين الأسفلت .. الحقوروووني .

مش واجب أصح بآه من الكابوس ده ؟ ! إنني أصحى .. مفيش  
صحيان .. ما هي فيه أحلام تربس كده .. قعدت أضرب نفسي ..  
أقرص خدي .. مفيش فوقان والحلم مش عاوز يخلص .

وأنا باجري .. أرنب كان معدى جنبي .. أنا طول عمري أحب  
الأرانب وارتاح لها .. ما صدقت لقيته .

- يا أرنب لو سمحت .. الشارع الرئيسي فين ؟!

الأرنب شافني من هنا .. وصرخ .

- أهوه .. ده اللي حط ماما في حلة الملوخية .. امسكوه .. لقيته ..  
أهوه .

مش واجب نصحى بأه من الحلم المنيل ده ؟ ! أبدًا .. الحلم شغال ..  
الست اللي أنا متجوزها دي والعيال ما حدش فيهم قلبه يأكله على أبوه  
ويجي يهزني يقول لي خشنام جوه يا بابا .. عاوز أصحى ياناس .

مسكني التعلب من قفایا .. والحيوانات كلها ماشية ورانا وهم  
بيهتفوا ووقفوني في ساحة .. في وسط الغابة .. كان الأسد قاعد ..  
وجنبه النمر .. في منصه معمولة من جذوع الشجر .. وراحوا حاطيني  
في قفص .. وفهمت إنهم قرروا يحاكموني .. وفتحت الجلسة .

الديك قال ..

- محكمة !


الأسد قال ..

- الحيوان الناطق ابن آدم .. اتفضل .

المحكمة كانت هايصه .. كل الحيوانات جاية تشمـت فيها .. وأنا  
واقف في القفص سامـع هوـه .. ونونـه وصـهـيل خـيـول ونـعيـق بـوم  
وزئـرـ أسـود .. أورـكـسـتـرا حـيـوـانـيـ كـامـل .. مـرـعـبـ .

ضرب الأسد بـرـجلـهـ عـلـىـ المـنـصـهـ فـلـقـهـاـ نـصـينـ ..ـ الـغـابـةـ كـلـهاـ  
سـكـتـ .. طـلـعـ التـعلـبـ وـقـالـ ..

- إنـ هـذـاـ إـنـسـانـ المـاـثـلـ أـمـاـمـكـ .. خـرـقـ كـلـ قـوـانـينـ الطـبـيعـةـ ..  
وـقـامـ بـغـيرـ حـقـ بـقـتـلـ الطـيـورـ وـالـحـيـوـانـاتـ وـالـنـبـاتـ وـالـأـسـماـكـ ..ـ هـذـاـ  
الـكـائـنـ السـافـلـ الإـرـهـابـيـ أـفـسـدـ الـبـيـئةـ الـتـيـ نـعـيـشـ فـيـهاـ وـهـدـدـ أـمـنـ  
وـسـلـامـةـ الـحـيـوـانـاتـ ..ـ وـلـذـاـ فـأـنـاـ أـهـيـبـ بـعـدـ الـتـكـمـ أنـ تـطـبـقـواـ عـلـيـهـ أـقـصـىـ



العقوبة وهي التمزيق إرباً .. وتقديم جثته لعدالة ملك الغابة ..  
هدية متواضعة من خادمكم المطيع .. الثعلب .

منافق بشكل التعجب ده ! طيب ودينبي لو ربنا طلعني من هنا على  
خير لأجيب للمدام الفرو اللي كانت طالباه .. بالعند فيه .

وطلع الشهود ليدلوا بشهادتهم .. دخلت البقرة .. وعدت  
قدامي .. وبصت لي عشان تعرف عليا .

- البقرة : أيوه .. هو ده يا ملك الغابة .. ده اللي دبح أولادي وأهلي  
وأكل لحمهم .. هو ده اللي قعد يحليب فيها ويأخذ لبنها ويشرب لما هد  
حيلي أنا .. أنا عاوزاكوا تنتقموا منه .. وتخلصولي منه اللي عمله فيها .

دخل الحمار .. وعدا جنبي ما عرفنيش .. وسابني ومشي .

التعجب قال له ..

- ما هو قدامك يا حمار .. أنت رايح فين ؟ !

الحمار رجع شوية .. ووقف قدامي وقعد يبص لي .. وقال ..

- أيوه .. هوه .. ده أنا أطلعه من وسط مليون كائن .. ده أنا شفت  
منه الويل .. كان يقعد يشيلني على ضهرى أحمال الدنيا كلها .. وينزل  
فيما ضرب من غير رحمة ولا شفقة .. ولما كنت أنهق .. ولا كأني باتكلم  
وفي الآخر يرمي شوية تبن .. أكلهم وأنا حرج أرجع اللي في بطني ..  
إنما .. ما كاوش قدامي غير كده .

وراح باصص للنمر .. وقال له ..

- أرجوك يا ملك الغابة .. خد لي حقي ..

التعلب صرخ فيه ..

- ملك الغابة قدامك أهوه يا حمار .. ده النمر .. غيره .

دخل الخروف .. وجرى عليا وأنا واقف في القفص .. كان هايچ  
ومش قادر يتمالك أعصابه .. وقعد ينطح فيها .. مسکوه وقعدوه ..  
وقالو له .. اهدا .. أنت جاي تشهد يا خروف .. قول شهادتك .

قال الخروف وهو بيعيط ..

- أنا .. أنا يعمل فيها كده .. ده أنا أطيب حيوان في الغابة كلها ..  
يجيبني ويحط لي شوية ميه ويربطني في شجره .. أقول معلش .. يمكن  
رایح مشوار وخفيف أحسن أتوه منه .. أولاده السفله المنحطين  
يقدوا يركبوني ويشدوني من قروني .. أقول معلش أهي عيال  
بتلعب .. وفي الآخر مش بس يدبخني .. ده يدبخ ويسلخ ويأخذ  
الصوف بتاعي حتى المصارين يخشيها رز .. ويعملها مبار .. اللي عمله  
فيه لازم يتعمل فيه .. لازم أشوف مباره بعانيا يا ملك الغابة .

الفيران قالت على المصايد اللي كنت بأعملها لهم .. والصراصير

اتكلمت على الشباشب اللي كنت بانزل بيها ضرب عليهم .. حتى

الدبان اتكلم على المنشة اللي كنت دايماً ماسكها وأنا قاعد الصبح في  
البلكونة .. وكل حيوان بأه يعني على ليلاه .

الكلب وقف وقعد يهو هو .. كان بيهو هو بمرارة .. وشاور عليا  
وقال ..

- الراجل ده عمره ما فكر يأكلني .. بالعكس .. أنا ما أنكرش إنه  
كان بيرمي العضم أقعد أقرقض فيه .. وساعات كان يعمل لي فته  
كمان .

أخيراً فيه حيوان في الغابة دي قال كلمة حق .. ربنا ما يحرمني منك  
يا كلب .

- إنما ..

- إنما إيه بأه !؟

- برغم أنه هو كمان ما ينكرش إنى كنت أخلص وأوفي المخلوقات  
بالنسبة له ، وإنى لما كان حد بس يقرب منه ولا من أولاده كنت أهبس  
فيه علطول ، برغم أنى بأفضل سهران طول الليل أحرسه وهوه نايم  
مرتاح .. ومع ذلك ما كانش يحلاله يشتم إلا بيا .. يابن الكلب قال ..  
ماله ابن الكلب ! بعد كل اللي عملناه بأينا خلاص سُبة ! شفتوانا  
للجميل زيه !



وطلعت اللبوة (مرات الأسد) وهي عماله تزار زئير مرعب خوف  
الأسد نفسه .. وقالت .

- سوا سمعتى بين كل الحيوانات وطلع عليا كلام أبيح وصورني  
وعمل لي سيديهات ، وبأه هو واللي زيه يبعتوا صوري SMS على  
التليفونات وأي واحده مشيها بطال يقولوا عليها ..... كأنى أنا بأيت  
النموذج للانحلال .. وإذا كنا ح نفتح لبعض بأه .. على الأقل أنا  
عمرى ما قلبت أسد وخدت اللي وراه واللي قدامه .. مش كده يا بنى  
آدم .. يابن البني آدمه.! وأنا بقولك أهوه والغابة كلها سامعه .. اللي  
يقول أنه لمس شعراء مني أحط مخالبي في عنيه .

وراحت تزار في وشى وقالت لي ..

- استنى عليا بعد الحكم .. إن ما كنت أقطعك .

القضية كده باينه من أهلها .. خسرانة .. خسرانة .. رفعت إيدي  
ملك الغابة وقلت له ..

- أنا عاوز محامي يا ملك .. يا إما أدافع عن نفسي .

الأسد قال لي ..

- هوه فيه محامي يرضى يمسك قضيتك يا واطي !!

قلت له خلاص ..



- أدفع عن نفسي يا ملك .. أظن كلکوا اتكلمتوا ممكن بأه  
 تسمعني .. أنا باعترف بكل الجرائم اللي قلتوها .. أنا فعلًا  
 عملت كل ده .. بس ما تنسوش إن أنا إنسان .. يعني ما  
 أقدرش أعيش من غير قتل ودبخ وتعذيب .. وطبيعتي  
 الإنسانية أنى أعيش على قفا غيري .. دي الحقيقة إنما ما تنسوش  
 كمان إن أنا باعمل كده في نفسي قبل ما باعمله فيكم .. أنا برضه  
 اللي بظلم البنى آدمين اللي زىي .. وبأعذبهم وبأقطع عيشهم  
 وبارميهم في المعتقلات .. أنا اللي باقفل بُقهم وبامنعوا أي حد  
 فيهم ينطق .. الكلاب عندکوا بتهو هو زي ما هي عاوزه ..  
 الحمير بتنهق على كيفها زي ما تفضل الأستاذ الحمار وقال .. إنما  
 أنا .. أنا مابقدرش أتكلم .. بتتكلموا على البيئة اللي أنا  
 دمرتها !! . ده أنا اللي اخترعت الأسلحة النووية والذرية اللي  
 بقتل بيها البنى آدمين أمثالى .. أنا كده .. أتولدت كده وح  
 أعيش كده وح أموت كده .. أنتوا زعلانين قوي عشان كام  
 واحد فيكم أتقتل ولا اتسلح ولا اندبح .. وده ييجي إيه في اللي  
 إحنا عايشينه ! .

حد فيکوا جرب النفاق ولا الكذب ولا الانتهازية ؟!. ما  
 ترد يا تعلب حد فيکوا جرب يقف في طابور العيش من  
 صباحية ربنا لحد العصر وفي الآخر ما يلاقيش خمسة أرغفة



يروح بيهم .. ويموت في الطابور .. ما ترد يا حمار .. حد فيكوا جرب يقوم من النوم الصبح يلاقي ضرائب جديدة ح تنحل وبره افترضت عليه وهو نايم؟ ما ترد يا طور .. حد فيكوا أخد منحه وقام الصبح لقاهم رفعوا الأسعار تلات أضعاف .. جربتوا حرقة الدم والحياة من غير أمل ولا كرامة ولا طعم ولا معنى ..

بدأ صوتي يجلجل في المحكمة والجلالة أخذتنى .. ونسى نفسي وقعدت أتكلم .. ما كانش هامنني ح يحكموا عليا بإيه؟ بس كان نفسي أتكلم .. أزعق .. أصرخ .. حلم حلم بس أقول اللي جوايا .

الحيوانات بدأت تبص لي بشفقة وتعاطف .. لدرجة إن الأسد عينه رغرت .. والتعلب بص في الأرض وحس بالذنب تجاهي .. وبدأت الحيوانات تنسحب من قدامي واحد ورا الثاني .

الأسد قال ..

- بما إن المتهم في حياته الإنسانية يعاني بالفعل من عقوبة أشد من عقوبة التمزيق إرباً فإننا لا نتوى أن نخفف العقوبة عنه .. رفعت الجلسة .

ولقيت نفسي في الغابة لوحدي خالص .. كل الحيوانات سابوني .. لمصيري ولقيت قدامي الطريق الأسفلت وعربيات معدية .. وفجأة



لقيت إيد بتطبّط على ضهري .. بأبص .. لقيته الخروف .. كان  
واقف ورايا..

قال لي ..

- معلش .. ما تزعلش بأه .. إحنا مُكْنَاش نعرف كل ده وأنا يا  
سيدي جاي لك بنفسي ع العيد الكبير .



## الهرمون ابن الهرمة

إذا كانت يعني الأجيال الجديدة بيت آلطوا علينا ، ومعقدينا وزاللينا بأنهم عفاريت التكنولوجيا والنت والفيسبوك واللاب توب ، إحنا كان من حقنا برضه كجيل إن أحنا نتالت ونحط رجل على رجل لأننا اتعلمنا وأخدنا شهادات ، في زمن ما كانتش فيه أسئلة الامتحانات بتتسرب وتتوزع على الطلبة قبل الامتحان . ومن حقنا برضه إن إحنا نتفسخر على راحتنا لأننا عديننا من الثانوية العامة من غير ما نرمي نفسنا من البلكونات ، ولا نولع في نفسها بجاز ولا نشرب صبغة يود .. كان الواحد يخش على ورقة الأسئلة يوم الامتحان زي الأسد.. يمسك السؤال من دول .. زي ما يكون قط ماسك فار من ديله .. ويقعد يحييه كده ويحييه كده ويشيله ويحطه .. صحيح في الآخر كنا بنجاوب غلط .. إنما النجاح أيامنا كان كفاية 48% عشان كان لهم قيمة أيامها .

\* \* \*

والتعليم في مصر يعتبر من عجائب الدنيا السبع ، زيه زي

الأهرامات كده .. حد عارف أتبنوا إزاي ؟ أهو محدث عارف



نظام التعليم في مصر اتعمل إزاي ؟ والحقيقة مشكلة التعليم في مصر يمكن ترجع لأيام الملك سنوسرت وناس بتقول قبل كده .. ولو قرينا مع بعض كده كام برديه من البرديات اللي كان أولياء الأمور بييعتوها للفرعون يشتكوا فيها من عيالهم اللي مطلعين أيهانهم في التعليم ، تحسوا إن الملك سنوسرت ده لسه فرعون مصر لحد دلوقت .. والإله تحوت كان هو إله المعرفة والتعليم .. وهو إله على شكل قرد .. عشان يقدر على المقاريد ومقاصيف الرقبه اللي كانوا مجذنين المدرسين في مصر القديمة .. ويُقال إن الإله تحوت راح للفرعون وهو بيعيط وقال له :

- أبوس إيدك .. شيلني من حكاية إله التعليم دي .. شوف لي أي حاجة تانية أباء إله ليها .. أباء إله الرقص والمسخره زي الإله (بس) أباء إله الإخصاب وقلة الحيا زي الإله (مين) .. إنشالله أباء إله الجبانة زي الإله (أنوبيس) ولا أباء إله يوم واحد على ولاد المجنونة دول .

\*\*\*

وزي ما فيه في السينما صراع بين الخير والشر ، وفي الكورة صراع بين الأهلي والزمالك ، فيه في التعليم صراع بين الآباء والأبناء .. والحوار اليومي بين الأب وأبنائه حول قضية التعليم لابد وأن يتنهى درامياً بانتهار الأب وليس ابن .



- ذاكر يا حيوان .. ذاكر ياتور .. ح اكسر التليفزيون على  
دماغكوا .. الله يلعن أبو الكمبيوتر على النت على اليوم اللي جبته فيه .  
دول طبعاً الآباء .. نيجي بأه للأبناء .. فلذات أكبادنا .. ربنا رازقهم  
برخامة يا أخي ! الواد يقعد يبص لأبوه وهو عمال ينشال ويتهبد قدامه  
وهو ولا هنا .. ضارب الجيل وسايب دقنه .. وحواجبه لازقين في  
بعض .. ومكبر ومنفصل عن الآخر .. ولا شتيمة بتجيip نتيجة معاهم  
ولا ضرب ينفع .. عيال ديجيتال .. لا فيه دم ولا إحساس .

وبعد الغُلب والزعيق وقطع النفس وتصلب الشرايين .. ونزيف  
الفلوس والدروس وخراب البيوت .. قال إيه .. نجح الشملول  
بالعافية .

طيب .. يعيد ويحسن ولا نوديه جامعة خاصة ؟!

الجملة دي من حوار الأم والأب اللي ح يجيدهم صرع في الآخر ،  
وقادعين يضربوا أحماض فيأسداس .. والواد ولا هو هنا .. ضارب  
البودي على البنطلون الساقط .. ونازل يقابل أصحابه بحواجبه اللي  
لازقين في بعض يا إما قاعد يعمل تشتات .

\* \* \*

وبعد الأم ما باعت اللي وراها اللي قدامها .. والأب ربنا وفقه  
واختلس ولا قبض رشوه .. (لاحظوا إن الفيلم كده داخل على هندي) .



- حانعمل إيه يابو وائل .. مش ابننا .. ح نسيبه كده .. أصحابه  
كلهم يروحوا الجامعة وهو قاعد في البيت .. ربنا يخليك ليهم .

- ربنا ياخذني يا شيخه ويريحني منكم .. ليه يارب ما خلقتنيش من  
مليون سنة .. كان الأب من دول يخلف الواد ويسيبه للطبيعة .. يرميه  
للحياة يصارع الوحوش والديناصورات .. يجري في الجبال والكهوف  
زي أي قرد مسئول عن نفسه .. الحكمة بتقول الحاجة هي أم الاختراع  
يعنى الواد مش ح يفلح ولا ح يسترجل إلا إذا كان مضطر .. إنما  
طول ما إحنا عمالين ندادي فيه عمره ما ح يفلح لا في دراسه ولا في  
دنيا ولا في آخره .

الحمد لله .. ربنا وفقنا ودخلناه الكلية .. عملنا شوية  
تضحيات .. بطلنا السجاير وخففنا شوية من اللحمه ..  
ورجعنا نركب أوتوبيسات .. وبالنسبة لبند المدوم بطلناه  
راخر .. بس كل ده يهون بصراحة .. وأنت شايف ابنك  
مقصوف الرقبه بأه شاب كده نازل رايح الكلية طول بعرض ..  
ما تنكرش إن دي حاجة تسعدك .

الشيء الغريب .. إن كل الحاجات اللي بطلناها عشان خاطر  
الشملول .. هو بدأ يمارسها .. حرية سجاير وما يأكلش غير  
مكدونالدز وجيبنا له عربية قسط .. وكل يوم نازل بطقم جديد .. وفي

نفس اليوم اللي أمه جاتني وقالت لي على جنب .



- أنت إيه اللي حصل لك يا راجل .. أنت نسيت أنك متجوز ..  
هئ هئ .. بقالك فوق السبع شهور مطنش .. أنت عجزت  
ولا إيه ؟ !.

في نفس اليوم ده جالي الشملول وقال لي إنه متجوز واحده زميلته  
عرفي وأهلها عرفوا !! يعني أنا شطبت والبيه شغال !! وقال إيه .. أمه  
بتضحك !!

قعدت أبص له .. وأبص لأمه .. وأنا متخييل اللي مكتوب في أخبار  
الحوادث .. رجل يخنق زوجته وابنه .. ويتحرر .. لا .. مانشيت  
تقليدي .. وبعدين ممكن يخللي الناس تتعاطف معاهم .. رجل يغز أبنته  
ويصاب بالجنون .. كده أباء انتقمت من الواد ومن أمه .. واقعد في  
الخانكة واكل شارب نايم بيلاش .. وقاعد مع ناس محترمه .. كانت  
الأفكار دي كلها بتدور في دماغي .. وفقت على صوت الشملول وهو  
بيقوللي :

- أصل رشا حامل يا بابا .

- مين ؟

- رشا .

- رشا مين ؟



- حامل ؟ !

- أيوه يا بابا .

- من مين ؟

- مني أنا طبعاً .

- وعاوزها تقدر معانا .

- أيوه .

- فين ؟

- هنا في بيتنا .

تقوم أمه داخله بالحمله اللي هي وابنها متفقين عليها .

- يقعدوا في الأوضة بتاعتنا .

- وإننا نقدر فين ؟ (ده أنا طبعاً)

- ننام في الصالة .. يعني هوه احنا بنعمل إيه بالأوضة .. هئ هئ .

\* \* \*

قاعد في الصالة .. المقر الجديد بتاعي .. ورشا وجوزها قافلين

الأوضة على نفسهم وسلطانية شوربة معدية قدامي في إيد المدام ..

رايحاهم .. وسرحت ، آه سرحت .. هو أنا ماليش حق إني أسرح كمان  
في البيت ده .

افتكرت يوم ما قابلت المدام .. اللي هي الست التخينة اللي معدية  
بالسلطانية قدامي من 23 سنة .. كانت رفيعة وكانت تخين .. كانت  
رقيقة .. وكانت عبيط .. أول ما شفتها هرمون ابن الكلب بتاع  
الذكورة .. اتحرك جوايا .. من غير أي مناسبة كده .. وقال لي هي  
دي .. حته هرمون ما يساويش تعريفه .. يخليني أروح أتقدم لها ..  
وأتجوزها ويوصلنى للمساواة اللي أنا عايش فيها دي !!

وأنا سرحان في هرمون ابن هرمونه .. لقيتنى باسراح من السرحانه  
دي لسرحانة تانية ليلة الدخلة .. الليلة السودة اللي أنا والمدام قررنا  
نجيب الشحط اللي قاعد جوه مع رشاده .. في اللحظه دي كانت  
بداية المؤامرة على حياتي .. حيوان منوي كان واقف وسط آلاف  
الحيوانات المنوية .. وسانن سنانه عشان يلقط البويضة وأنا زى  
الأهل ولا دريان .. كنت مبسوط قوى .. ماكتتش عارف إنها ح  
تقلب بغم بعد كده .

\* \* \*

ومن سرحانة ليلة الدخلة .. لسرحانة تانية مش قادر أنساها .. لما  
أمه كانت حامل فيه .. تسع شهور ورانا الويل .. ترجيع ودوخه



وغممان نفس واكتئاب ومغض وكل ده وأنا مستحمل .. وصابر ..  
ومستني تولد .

هي ولدت حضرته من هنا .. ومن أول مانزل .. عياط ونكد  
وواء .. واء .. أنت داخل عزا يابني .. ده أنت داخل دنيا ..  
وشيل يا بابا .. وغير له يا بابا .. والتطعيم يا بابا .. ثانية واحدة ..  
يا مدام .. الطبق ده فيه إيه ؟

- دي فتة كوارع .

- رايحة فين دي !؟

- رايحة لرشا وجوزها .

\* \* \*

كل يوم بيعدي بيزيid أتعجبي بمرسي صاحبى .. اللي اتجوز وفي ليلة  
الدخلة .. قلع بدلتة ولبس بيجامته وهي قلعت فستان الفرح ولبست  
قميص نوم .. وراح بaisها في قورتها .. وتصبحي على خير وراح  
نایم .. الباب اللي يجيلك منه الريح سده واستريح .

\* \* \*

إنما برغم إن فيه عيال تنقط وتفرس اللي عمره ما أفترس .. فيه  
برضه عيال تفرح أكيد .. صحيح هما قله .. إنما موجودين .



عندك متولي صاحبي التاجر اللي في الوكالة .. قال لي شوف الرك  
على العيل .. الواد بيبيان من أول ما ينزل من بطن أمه ناوي يمشي عدل  
ولا لبط.

أنا عندي إبراهيم ابني .. بسم الله ما شاء الله .. ربنا يحميه .. خلقته  
كده .. ماتعبنيش من يومه .. نازل من بطن أمه متحمل المسئولية ..  
ومعتمد على نفسه ، الواد نزل من بطن أمه بيضحك .. بأت التمرجية ح  
تجنن وهي بتتشد .. كان لما ييجي يعملها على روحه زي كل العيال ..  
ثلاثة بالله العظيم كان يديني إشاره وهو لسه في اللغة .. نقلعه البامبرز  
ويعملها ونرجع نلبسهو له تاني .. لفة البامبرز اللي جينا هاله أول ما  
أتولد .. ما خلصهاش .

جيـت أدخلـه المدرـسـه .. طـلـع سـنـه بـالـيـوـم هوـالـلـيـ مـطـلـوب حـسـب  
لوـاـيـحـ الـوـزـارـة .. تـقـولـشـ ظـابـطـ نـفـسـهـ عـلـىـ الـمـيـعـادـ عـشـانـ يـرـيحـ أـبـوهـ ..  
ماـهـ فـيـهـ عـيـالـ رـزـلـهـ بـيـتـولـدـواـ فـيـ شـهـورـ عـجـيـبـهـ .. تـيـجيـ تـدـخلـهـ المـدـرـسـةـ  
يـقـولـكـ .. لـسـهـ ماـ كـمـلـشـ السـنـ القـانـونـيـ .. أـوـ كـبـيرـ فـيـ السـنـ .. وـسـاعـاتـ  
بـأـهـ الـلـيـ يـبـأـهـ فـارـقـ يـوـمـ وـاحـدـ وـيـجـنـتـكـ إـنـهـ أـبـوـ خـلـيلـ .. إـبـراـهـيمـ رـاجـلـ منـ  
يـوـمـهـ .. مـنـ وـهـوـ فـيـ أـوـلـىـ أـبـتـدـائـيـ بـيـجيـ مـنـ مـدـرـسـتـهـ قـبـلـ مـاـ يـقـلـعـ مـرـيـلـتـهـ  
يـعـملـ الـوـاجـبـ .. أـهـوـ النـهـارـدـهـ مـاـ شـاءـ اللـهـ فـيـ تـالـتـهـ إـعـدـادـيـ .. إـنـهـ يـعـقدـ  
لـكـ الـلـيـ فـيـ الـكـلـيـةـ .. تـعـالـىـ يـاـ إـبـراـهـيمـ .. تـعـالـىـ .. سـلـمـ عـلـىـ عـمـكـ .



دخل إبراهيم .. ولد شكله مؤدب وفارق شعره على جنب  
ونموذج للطالب المثالي أبوه قال لي ..

- وحياة النبي لتسأله .. إسأل في أي حاجة .. اديله أي سؤال .. ده  
ح يكيفك .

- أسأله في إيه بس يا حاج متولي .

- في أي حاجة .. تاريخ .. جغرافيا .. نحو .. إنجليزي  
فرنساوي .. طلاق بالثلاثة لتسأله أنا عاوزك تستممخ منه .. ربنا  
يحميك يا إبراهيم.

- طيب .. نسأله في التاريخ .

- ده جايب في التاريخ خمسين من خمسين .

- طيب يا إبراهيم .. أخذتوا الثورة العربية .

- أيوه يا عمي .

- صلاة النبي أحسن .. ربنا يزيدك يا هيبا (ده طبعاً أبوه) .

- كويس .. مين القائد اللي قام بالثورة العربية .

- سعد زغلول .

- الثورة العربية ح يقوم بيها سعد زغلول إزاي يا إبراهيم .



- أصل مدرس التاريخ السنة دي ما كملش معانا .. جه حصتين  
أول السنة وبعدين استقال .. فتح عربية أكل في جامعة الدول .

- وما جابوش مدرس بدلاته .

قال لي ..

- لا؟

- أمال حচص التاريخ كنتوا بتاخدوا فيها إيه ؟

- كُنا بنلعب قدام المدرسة .

متولي أبوه .. قال لي ..

- أسأله في حاجة تانية يا بو حجاج .. ده إبراهيم جامد قوى ..  
سيك من التاريخ .. أسأله في العلوم .. حاكم إبراهيم أسطى في  
العلوم بالذات .

- طيب تعرف إيه عن قانون الجاذبية يا إبراهيم .

- هه !؟

- بتابع نيوتن يا إبراهيم .

- مين نيوتن ده يا عمي .. أصل بصراحة أستاذ العلوم ما جاش  
غير آخر السنة عمل لنا مراجعه سريعة كده وادانا ملخص الامتحان  
جه منه والملخص ما كانش فيه نيوتن .



- طيب ليك في الشعر يا إبراهيم؟

- إلا العربي .. إبراهيم في اللغة العربية معلم (ده طبعاً أبوه) د. هو نفسه بيشعر !!

- تعرف إيه عن عباس العقاد؟

- أعرف أنه موازي لمكرم عبيد .

- راح أبوه مخمس في وشي .. اللهم صليع النبي ده ماراحش  
مدينة نصر غير مرة واحدة معايا لما كنا بنزور عمته .. شوف لقطها  
إزاى ربنا يحميك يا هيمها .

- مدينة نصر أيه يا أخواننا عباس العقاد شاعر ومكرم عبيد  
سياسي .. معقوله ما درستوش العقاد؟ أمال أخذتوا إيه في العربي  
يا إبراهيم؟!

- أصل مدرسة العربي كانت حامل وولدت توءم وطول السنة كانت  
دايخة وكل ما تيجي تشرح تسيب الفصل وتروح ترجع في الحمام .

\* \* \*

نزلت من عند متولي وأنا باضرب كف على كف .. إبراهيم من  
الأوائل؟! طيب تيجي إزاى .. وعرفت إزاى .. الحكاية باختصار إن

النتيجة لما طلعت المدرسة كلها كانت ساقطة لم ينجح أحد .. وطبعاً  
أولياء الأمور ح يقلبوا الدنيا .. والوزير ح يستجوبوه في مجلس الشعب

وعشان كده اضطروا بتجيئات من المنطقه التعليمية إنهم يعملا بجان رأفة ويحسنو النتيجة شوية .. لجان الرأفة اكتشفوا إن تلات تربع الطلبة ما بيعرفوش يكتبوا أساميهم والربع الثاني بيغلط في الإملاء .. وطبعاً دي ح تبأه فضيحة والصحافة ح تكتب .. وفي مراجعة الورق اكتشفت اللجنة إن إبراهيم متولي كاتب اسمه صح واسم أبوه صح مفيش حرف ناقص ولا زايد .. عشان كده إبراهيم طلع الأول واحتفلوا بيها في المدرسة وفي البيت وأبوه جاب له عجله هدية التفوق .

وعشان كده لما رحت لسلیمان صاحبي وكانوا بيحتفلوا بتخرج ابنه الكبير وائل من كلية الآداب قسم فرنساوي بتقدير عام جيد جداً .. لما قلت له وأنا بهزز معاه .

- بونجور وائل كومان تاليفو ؟!

بص لي وائل كأني باكلمه ياباني وقال لي ..

- تقصد إيه يا عمي ؟!

ما استغربتش خالص من رد وائل .. يمكن في أربع سنين الكلية قسم فرنساوي ما خدوش بونجور دي .

\* \* \*

هو ده السيناريو اللي بيحصل كل يوم .. ومع ذلك يا أخي .. لسه فيه ناس بيتجوزوا .. ويختلفوا ويعلموا ويدخلوا مدارس وكليات ..

والناس عماله تزيد والمصاريف عماله تزيد .. ولا كباري نافعة  
ولا أنفاق نافعة .. وكل ده بسبب الهرمون الحقير ابن الهرمة .. اللي  
اسمه هرمون الذكورة وبسبب حيوان ما يزيدش عن أي فيروس  
تافه .. اسمه الحيوان المنوي ..

أعزائي .. جاتها نيله اللي عايزه خلف .. وده أدب تعبير لقيته  
عشان أعبر عن اللي جوايا دلوقت ..



## • علّي صونك .. علّي صونك •

للأسف .. هي دي الحقيقة .. الصوت العالٍ هو اللي بيوصل بصرف النظر عن اللي بيقال .. والأصوات الهادية منها كانت عميقه وحقيقة عمرها ما حد يسمعها ولا بيهم بها .. طبعاً أنتوا ملاحظين الحكاية دي .. المهم الفوليوم (volume) .. طول ما الفوليوم ع الآخر .. تبأه خلاص .. وصلت .. معنى كده إيه ؟ إن الزعيم هو الحل .. والخنجرة القوية منها كانت قبيحة أو مزعجة هي الوسيلة المضمونة لاقتحام ودان الناس وعقو لهم والتأثير عليهم ، وعشان كده صوتي الضعيف قعد يضيع .. يضيع بين الأصوات العالية لحد ما تلاشى .. وبجد أنا نفسي ما بقىتش سامع نفسي .

نعم .. حاضر .. بتزعق بتقول إيه ؟ ح أعلى صوتي شويه .. كنت في ندوة ثقافية .. ومعركة الخنجر كانت على أشدتها .. كل واحد عمال يعلى الفوليوم على الثاني .. اليساري المعارض .. طلع وقعد يسخن شوية لحد ما ظبط الخنجره على الماكسيم وراح فاتح بآه .. بتاع الحكومة ما سكتش .. ما هو عنده راخر حنجرة ما يعدمههاش .. دي

الحكومة جايها عشان دي .. راح مشغل الأمبيليفاير و مدتها ..  
الصوت العالي معدى زي ما انتوا عارفين .. كل واحد في الندوة بأه  
يتكلم ويحاول إن صوته ي بيان .. بأينا خستلاف واحد بيزعقا في نفس  
الوقت .. كأنك مشغل سيمفونيات بيتهوفن التسعة في وقت واحد  
و قاعد بتسمعهم مع بعض .. وطبعاً اللي اتسمع في النهاية .. الصوت  
العلالي .. أعلى الأصوات و غالباً أنكرها .. وبرغم أن كل اللي بيقوله  
كان كلام فاضي إنما القاعة كلها قعدت تسقف له .. وأنا برغم إني  
اتكلمت في الندوة وقلت رأيي بس متهدائي إن محدث سمعني من  
أصله .. لأنني قابلت واحد صاحبي تاني يوم لقيته بيقوللي ..

- امبارح كانت فيه ندوة كانت عاوزاك .. أنت ما جيتش ليه ؟

يبدو أن صوتي كان ضعيفاً للدرجة أنهم لا سمعوني ولا حتى  
شافوني .

خرجت من الندوة .. أنا والراجل أبو صوت عالي .. كان خارج طبعاً  
نافش ريشه زي الطاووس وبرغم إنه ما كانش بيtalk إنما صدى صوته  
كان لسه شغال .. شاورت لتاكسي في نفس الوقت اللي الرجل صرخ فيه  
وقال ..

- تاكسي .. عابدين يا أسطري .



سوق التاكسي برمغم أنه جه لحد عندي في الأول ووقف ، أول ما سمع صوت الراجل راح عامل مرشدير وراجع له .. والراجل أبو صوت عالي هوه اللي ركب .

روحت البيت .. استقبلتنى المدام بصوت عالي برضه ..

- ندوة إيه اللي كنت فيها .. هي الندوة دي ح تأكلنا ولا ح تشربنا .. ده بدل ما تقعد تكتب لك كلمتين عشان تدفع مصاريف المدرسه بتاعة البنت .. ما ترد عليا .. سايبني قاعدة أنبح في صوتي وواقف بتبعص لي .. ما تنطق .. أنت بتقول إيه ؟ . شوف الراجل بيحرك شفائيه وما بيتكلمش !؟

أنا أذكر أني رديت ساعتها على المدام إنما واضح برضه إنها ما سمعتنيش وأنا كان مش فاكر أنا قولت إيه ؟ لأن صوتي ما كانش طالع . المسألة بدأت تقلقني فعلاً .. أنا حاسس إن أنا باتكلم بس اللي حوالييا مش حاسين .. يباء فيه عيب في آلة النطق .. ما هو مش معقول يكون الناس كلها انطرشت .. لازم العيب فيا .. كل ما الأصوات اللي جنبي تعلا صوتي أنا يروح .. يباء فيه مشكله في الصوت .. حتى لما رحت أديت صوتي في انتخابات مجلس الشعب .. اللي أنا اديته صوتي سقط .. يباء الصوت ماوصلش .

\*\*\*



رحت لدكتور أنف وأذن وحنجرة .. بص على حنجرتي  
وقال لي ..

- أحبالك الصوتية ضايعة خالص .. أحبالك من النوع القديم ..  
مهريه .. الناس كلها دلوقت مشغله الهموم ثيـاتـر (Home Theatre) ..  
صوتـك محتاج طقم ساعات جـديـد .. العـجـيل عـنـده حاجـاتـ كـوـيسـةـ .  
الـغـرـيب .. إنـ الدـكـتـورـ نفسـهـ كانـ بيـكـلـمـنـىـ بصـوتـ عـالـىـ جـدـاـ ..  
صـوتـ مـجـسـمـ كانـ جـايـ ليـ منـ كـلـ حـتـهـ .

\* \* \*

رحت لدكتور نفسيـاني .. نـيمـنـيـ علىـ الشـيزـلـونـجـ وقالـ ليـ وهوـ بـيـزـعـقـ .  
برـضـهـ .

- آخر مره سمعت صـوتـكـ كانتـ إـمـتـىـ ؟ـ وهـلـ صـوتـكـ رـاحـ  
تـدـريـجـيـاـ ولاـ قـمـتـ منـ النـومـ ماـ لـقـيـتهـوـشـ ؟ـ !ـ أـسـمـعـ ..ـ المـسـأـلـةـ مشـ  
مـسـأـلـةـ حـنـجـرـةـ أـنـتـ صـوتـكـ ضـعـيفـ لـإـنـكـ مشـ وـاثـقـ منـ نـفـسـكـ ..  
أـنـتـ خـاـيـفـ تـعـلـيـ صـوتـكـ ..ـ رـوـحـ أـيـ شـاطـئـ ..ـ وـاقـفـ عـلـىـ الـبـحـرـ ..  
وـزـعـقـ ..ـ مـشـ مـهـمـ تـقـولـ إـيـهـ ؟ـ المـهـمـ إـنـكـ تـدـرـبـ نـفـسـكـ عـلـىـ الصـوتـ  
الـعـالـىـ ..ـ بـتـوـعـ الفـراـشـهـ لـماـ بـيـجـواـ يـرـكـبـواـ المـيـكـرـوـفـونـاتـ بـيـقـولـواـ إـيـهـ ؟ـ  
وـاحـدـ ..ـ اـتـنـينـ ..ـ تـلـاتـةـ ..ـ أـرـبـعـةـ ..ـ مـشـ مـطـلـوبـ منـكـ أـكـثـرـ مـنـ كـدـهـ .

\* \* \*

مـكـتبـناـ

WWW.HARTBTRAZI.COM

بيـتـ الـكـتبـ



رحت على السوبر جيت عشان أقطع تذكرة لبور سعيد .. هاديه وأهو الواحد يزعق هناك براحته .. وقفـت على الشبـاك .. وقـدت أهـاتي .. عـامل التـذاكر ما كانـش سـامعني خـالص .. من كـتر الزـعـيق اللي كانـ عند الشـبـاك ..

وأخـيرـاً قـطـعت التـذـكـرة بـعـد ما جـدع ابن حـلال فـهم أنا عـاوز إـيه .. وـشـرح لـعـامل التـذاكر .. نـهاـيـته رـحـت الأـتـوبـيس وـطـلـعـت .. وـقلـت لـلـسـوـاق ..

- من فـضـلك فيـه هـنـا حـمـام !؟

- نـعـم .. بـتـقول إـيه ؟

- حـمـام .. حـمـام .. توـالـيت .. كـبـينـيـه .. دـورـة مـيـه .. كـنـيف ..

- ما تـعلـّـي صـوتـك يا عـم أنا مش فـايـق لكـع الصـبـح ..

شاورـت له زـي ما كـنت باـشـاور للـأـبـلـة وـأـنا في اـبـتـدـائـي .. وـأخـيرـاً فـهم ..

- الحـمـام مش شـغـال .. رـوح الحـمـام اللي في المـحـطة بـس بـسرـعـة .. العـربـية طـالـعـه السـاعـة سـبعـه بـالـثـانـيـة ..

جريـت أدـورـ على الحـمـام بتـاعـ المـحـطة .. كلـ ما أـسـأـل حدـ يقولـ لي .. نـعـم .. بـتـقولـ إـيه ؟ نـاسـ اـفـتـكـرـونـي شـحـاتـ وـنـاسـ اـفـتـكـرـونـي وـاحـدـ



تذكرة ضاعت ومش عارف يسافر .. وناس بأت تقول .. أعود  
بإله .. دول ملوا البلد .

\* \* \*

حتى في الحمام .. الناس ما بتبطلش كلام .. وصوتهم عالي بشكل  
فظيع .. كان واقف جنبي في المبوله وبيتكلم في المحمول .

- أيوه يا بونورا .. أنا لسه ما ركبتش .. أنا في المحطة .. ح آخد  
ميعد سبعه .. لا .. هوه أناح أسييه .. ده أناح أطلع عين أمه .. هع  
هع هع .. كغ كغ .. آه .. رحت له البيت عنده .. وشرشت له  
قدام الناس كلها .. جيبيت له القديم والجديد .. محدش بآه عارف  
يسكتني .. ما هو الناس ما تجييش إلا بكده .

صوته خرم ودني .. لازم المسافات بين الواقفين في المبوله تكون  
أكبر من كده .. ده أقل حق من حقوق المواطن .. أناح اكتب الاقتراح  
ده .. إنما مين ح يسمعني .

\* \* \*

ورجعت الأتوبيس .. كان يا دوب هيتحرك .. ولسه طالع .. كان  
واحد واقف على السلم عمال يزعق ويهلل .

- كرسى نمرة 15 .. نمرة 15 .. راح فين نمرة 15 الله يوقف



رد السوق وقال له ..

- قال راح الحمام قال .. دي ناس معندهاش إحساس .

- يا عم نطلع ونسبيه .. عشان يبأه يتعلم الساعه بآت سبعة  
وخمسة .

نطيت جرى في الأتوبيس وأنا باخد نفسى بالعافية .. والسوق  
طلع بالعربية في آخر لحظه .

الراجل اللي كان واقف على السلم ما صدق شافنى وكأنه شاف  
كلب جربان .

- يعني عاجبك العطله اللي إحنا فيها دي .. ح نقدر نستاكوا لما  
كل واحد ييجي على راحتة .. الأتوبيسات دى مش ليها مواعيد ..  
ولسه ح نقف في مصر الجديدة كمان .

قلت له ..

- معلش .. أنا آسف .

- نعم .. بتقول إيه ؟

- أنا آسف .. آسف يا جماعة .

- آسف بعد العطلة دي كلها وجاي تقول لي آسف .. نصرفها

منين آسف دي ؟

- أنا والله ما عارف أقول إيه؟ أنا باعتذر لك وباعتذر للأتوبيس  
كله .. ما تأخذنيش يا أسطى وحضرتك كمان أنا ممكن أبوس راسك .  
للأسف .. محدش سمعنى لا السوق ولا الركاب ولا الرجال اللي  
واقف على السلم .. اللي كان عامل زي البركان عمال يهيج ويزعق ..  
ويخبط بأيدىه على تابلوه العربية .

- بأي حق كلنا نقعد نستنى جنابك .. على راسك ريشه .

- أنا غلطان والنعمة الشريفة غلطان .. وعمري ماحتأخر على  
أتوبيس بعد كده .. دي أول وأآخر مرة .

كل ده قلته .. إنها محدش سامعني برضه .. فيه مشكله في الصوت ..

- إحنا اللي غلطانيين .. كان لازم نسيبك ونمسي عشان اللي زيك  
يتعلموا ، ده أنا صوتي اتبعد وأنا عمال أقول كرسى 15 .. كرسى 15 ..  
جتкова البلا .

بوست رأسه .. ورأس السوق ورأس الركاب رأس رأس ..  
ورحت أقعد في الكرسي بتاعي .. كرسى 15 لقيت راجل تخين قاعد  
مكانى ورايح في ساق نومه .. برقه شديدة .. هزيته .

- من فضلك .. لو سمحـت .

الراجل فاق وهو مذعور .. وصرخ .

- نعم .. فيه إيه ؟

- لأ مفيش .. أصل ده الكرسي بتاعي .

- بتقول إيه ؟ عاوز إيه ؟ ما تنطق .

وريته التذكرة .. ما هو أنا لو قعدت أتكلم من هنا لبكرة مش ح  
يسعني .

بص في التذكرة .. وقال لي ..

- ما تترمي في أي حته يا عم الحاج .. خلاص .. الكرسي بتاعك ..  
كنت أشتريته ، تصحيبني من النوم عشان تقدر الكرسي بتاعك .

رد عليه الرجل اللي واقف عند الباب وكان نازل تهزئه فيا من  
المحطة لحد مصر الجديدة وقال له ..

- جاي متاخر ومعطلنا .. وقال إيه .. عاوز الكرسي بتاعه .. ناس  
معندهاش دم ..

\* \* \*

وصلنا مصر الجديدة .. والأتوبيس وقف .. وبعض الركاب نزلوا  
الي عاوز يشرب سجارة .. يشتري باكيو بسكوت .. يخش الحمام ..  
وصاحبنا اللي واقف على السلالم نازل تبكيت فيا .. مش قادر يشيلني  
من دماغه .



- أصل كل واحد وراه أشغاله ومصالحه .. (وبعدين يبص لي)  
أنت فاكر إن إحنا شغالين عندك .. لما تأخرنا؟!!

- معلش دول خمس دقائق .. محصلش حاجه .

- إيه؟ بتقول إيه؟ خمس دقايق .. كنت عاوزنا نستناك أسبوع .

- خلاص بآه .. أهو اللي حصل .

- إيه بيقول إيه ده .. أنت مش مكسوف على دمك .. أهو اللي حصل هو قال اللي حصل .. دي بجاحة يا أخي .. والله العظيم بجاحة الواحد لما يغلط يسكت .. ولا يتأسف .. إنما إحنا كده .

كل ده والأتوبيس واقف في مصر الجديدة .. أكثر من نص ساعة ابتدوا الركاب يزهقوا عاوزين يمشوا .

- يا أسطى .. واقف ليه .. ما تطلع .

السوق ..

- فيه واحد لسه ما طلعش .. بيشرب سيجارة .. أسيبه وأمشي .

جري الرجل اللي واقف على السلم وهو يفرقع من الغيط .

- ما هو اليوم باین من أوله .. الآخر (راح مشاور علیا) يوقفنا في الموقف عشان نستنى جنابه .. اشمعنى .. لازم كله يعمل زيه .. (راح باصص لي بغيط) .. آدي نتيجة إن إحنا استنيناك كله بآه ح يبلطج .

بعد ساعة إلا ربع طلع الرجال اللي كان بيشرب سيجارة بكل بروء  
ودخل الأتوبيس .. ولا كأنه عمل حاجه .

الرجل اللي واقف على السلم أول ما شافه راح صارخ فيه ..

- عاجبك العطله دى أنت راخر .. ساعة بتشرب سيجاره ؟

وفجأه الرجل اللي كان بيشرب سيجاره راح مصرخ فيه ومبرق  
وبصوت جهوري هز الأتوبيس كله .. قال له ..

- وأنت مال أهلك .. أنت ح تحاكمني .. ده أنا أطلع عين اللي  
خلفوك .. أقعد ياله .. وخليلك في حالك أحسن لك .

... بس .. أنا قولت ح تولع !

عارفين إيه اللي حصل ؟ !.

الرجل اللي واقف على السلم لما لقاوه بيصرخ فيه قوي كده  
وبصوت أعلى من صوته .. سكت خاااااص .. مقدرش حتى يرد  
عليه والرجل الثاني عمال يهلل .

- ما تيجي تربيني يا روح أمك .. ما تيجي تعلمني الأدب .. ما  
تاكلني جوز أقلام .

وراح مقرب منه وصارخ فيه صرخة عنترة في المفرج بن همام ..




- إيسبيه .

- وراح زاغده في كتفه ...

الراجل اللي واقف على السلم قال له بكل أدب وبصوت واطي  
جداً .

- أنت كده أخويا الكبير .



## كلام أبيح !!

المشكلة في الكلمة نفسها .. الكلمة سمعتها سيئة .. ليها جرس عال منزعج .. كأنها كلمه أبيحة .. الكلمة هي .. أنا آسف .. مضطر أقولها .. يا ريت الأطفال الصغارين يسدوا ودانهم .. عشان أقول الكلمة ..

الكلمه هي .. الضرايب ..

سوري يا جماعة إني بأقولها كده خبط لزق .. أنا مش متعود أقول كلام خارج .. إنما بما إننا حنا نتكلم في الموضوع وبشكل علمي .. لا حياء في العلم .

الحقيقة أنا قعدت أفكـر في تركـيب الكلـمة عـشـان أـعـرفـ هـيـ ليـهـ بـتـسيـبـ الأـثـرـ الـوـحـشـ دـهـ فـيـنـاـ .. يـمـكـنـ لـأـنـهـ مـشـتـقةـ منـ فعلـ (يـضـربـ)ـ وـإـحـناـ مـضـرـوبـينـ خـلـقـهـ .. إـنـمـاـ مـعـلـشـ .. خـدـونـيـ عـلـىـ قـدـ عـقـليـ ..ـ حـاـوـلـواـ تـعـاـمـلـواـ مـعـ الـكـلـمـةـ .. وـتـقـرـبـواـ مـنـهـ شـوـيـةـ .. مشـكـلـتـناـ إـنـ إـحـناـ بـعـادـ عـنـهـ .. عـاـمـلـهـ زـىـ الـبـعـبـعـ الـلـيـ بـيـخـوـفـواـ بـيـهـ الـعـيـالـ الصـغـيرـينـ ..



طيب محدثش فيكوا فكر مثلً إنها حاجه كويسيه !! أصبروا عليا شوية  
أبوس إيديكوا .. أنا لا الحكومة باعترافي ولا وزاره المالية .. ولا جاي  
أقولك مصلحه الضرايب مصلحتك أوّلا .. لا .. أنا باقول يعني ..  
ما تحاول تحبها .. حتى لو كانت معكتنة عليك حياتك .. أنت مثلًا  
بتحب المدام ولكن بالله عليك قوللي إيه الحياة الزوجية دي اللي  
ماشييه بهدوء وما فيهاش عكتنه .. ودي يباها طعم؟! أنت بتحب  
أولادك !! صح .. لكن لو ما طلعوش عينك .. وده يكسر فازه قيمة  
معتز بيها قوى حضرتك .. وده حرارته تباء أربعين الساعة 2 بالليل  
وتدور بيها على المستشفيات عشان أكل حلاوه بالشطة .. ولا اهانم  
الصغيرة بنتك لما بلعت بليه ولا صفاره وبأيت تلطم على وشك ..  
بخدمتك مش هي دي روعة الحياة ، عشان كده أنا شخصيًّا باتعامل  
مع الضرايب بالشكل ده .. بتعايش .. واستسلام وإيمان أكيد جوايا  
.. إنى طول ما أنا عايش .. لازم أدفع .. شفتو المسأله سهله إزاي !!  
حسينوا ب حاجة !!

\*\*\*

عشان كده أنا باقترح على حكومتنا اللي مقطعيه نفسهااليومين دول  
عشان تدور على أفكار جديدة .. لضرايب جديدة .. ومتش عارفه  
تجيب فلوس من الناس إزاي ؟! باقترح عليها شوية اقتراحات .. والله  
لاقت القبول يباه بارك الله فيما رزق .. الاقتراحات دي لو اتنفذت إن



شاء الله ح تبأه حكومتنا من أغنى الحكومات في العالم .. والحكومة لوارتاحت .. الشعب يرتاح علطول .

\* \* \*

أنت بتدفع .. كمواطن .. ضرائب عن الدخل والإيراد العام ..  
وبتدفع ضريبة مبيعات وجمارك .. وبتدفع غرامات طول ما أنت ماشي  
بعربتك .. وبتدفع ضريبة ع العربية نفسها .. وح تدفع مبلغ محترم  
عشان تطلع جواز سفر . وبتدفع ضريبة عن الشقة اللي أنت عايش  
فيها .. وطول ما أنت عايش بتدفع دمغات ورسوم .. وحاجات .. أنا  
ما انكرش إنها بذمتك يا شيخ .. وحياة أولادك اللي بتسترجاه من  
الدنيا .. اللي بتدفعه ده كفاية ؟! أنا راضي ضميرك .. ومش ح امد  
إيدي آخذ حاجه من جيبك .. أنا عاوزك أنت مع نفسك كده اللي  
تراجع نفسك .. وتقول لي .. إذا كانت دي غلاوة مصر عندك ..  
خلاص يا عم اللي تدفعه .

\* \* \*

أنت علطول عامل إنك بتحب مصر ونازل غنا في مصر .. إنما  
ساعة الدفع يا أخي تلاقي البلد فاضيااااه .. يا أخي دي شيرين  
لسانها أتلوي .. عماله تديلك في كلام بالمحسوس وأنت ولا هنا ..

ما شربتش من نيلها ؟! لا طبعاً شربت إنما بستعبط .. بتحب مصر !!  
وريسي بأه حبك لمصر ده .. الحب مش كلام .. الحب فعل .

\* \* \*

أنت مثلاً ساكن في شقة مطروحين وصالات .. شقه بحرى الشمسم  
بتخشنها وتبرطع فيها وعندك حته بلكونة حلوة كده وقاعد في الشمس  
تقرا الجرائد وتشرب قرفه .. حياة عظيمة .. ما فكرتش إن فيه مواطن  
تاني مصري برضه زيك عايش في مقابر تحت الأرض والشمس دي ما  
بيشوفهاش من أساسه !!

ما تدفععش يا أخي كام جنيه لا راحوا ولا جُم ضريبة شمس  
وهو .. حاجة بسيطة لا تُذكر .. إنما لو افترضنا إن الشمس بتخشن  
نص البيوت المصرية .. يعني فيه 40 مليون نسمة قاعدين يت shamso ..  
لو كل واحد دفع خمسة جنيه بس في السنة ضريبة الشمس .. آدى  
200 مليون جنيه .. ضريبة الشمس بس.

\* \* \*

طبعاً أنت كل سنة بتروح تصيف في إسكندرية ولا في بور سعيد  
ولا في الساحل .. وطبعاً أنت بتشوف بعينك الزحمة والناس بتباه فوق  
بعض .. قاعد حضرتك على الرملة وبتبص للبحر وتملا صدرك  
باليد .. وآخر روقان .. بتدفع حضرتك تمن ده ؟! نموت في  
أبو بلاش إحنا !! لو دفعت جنيه واحد .. جنيه ضريبة يود .. وجنيه



ضريبة رملة وجنيه ضريبة بلبطه في الميه .. مش كده نخش على نص  
مليار جنيه في صيفية واحده .. والله يا أخي لو اعتمدنا على نفسها  
وحبينا البلد دي بجد ما حندم أيدينا لحد .

\* \* \*

نيجي بأه لضريبة الأسفلت .. الأسفلت ده مين اللي بيسلته ؟ مش  
الحكومة .. الحكومة هي اللي بتجيبي الزفت وتزفت الشوارع ..  
علشان سعادتك تفضل رايح جاي عليه بعربيتك .. وطبعاً لو لقيت  
نقره ولا مطب ما نخلصش منك ومن قرفك .. طيب لو دفعت  
حضرتك ضريبة أسفلت عن كل ألف كيلو تمشي بيهم بالعربى فيها  
حاجه دى ؟ ! حاجة بسيطة لا تذكر .. إنشالله نص جنيه .. أنت مش  
ح تحس بيهم .. إنما الحكومة ح تحس .. والفلوس دي يعني الحكومة  
ح تعمل بيها إيه ؟ ح تحطها في جييها لا سمح الله .. لا .. ح تجيبي  
بها زفت ..

\* \* \*

نيجي بأه للأوكسجين اللي أنت نازل شهيق فيه من يوم ما تتولد  
لآخر يوم في عمرك .. تخيل سيادتك 80 مليون نسمة بيسقطوا  
أوكسجين في نفس الوقت غير السواح .. يا أخي قول السواح  
بيدخلوا عملة صعبة .. لكن أنت بتدخل إيه ؟ ما بناخدش منك غير



ثانى أوكسيد الكلربون .. طيب الحكومة تعمل إيه ؟ ماتدفع ضريبة  
بسقطة جنيه واحد في السنة كلها .. ضريبة أوكسجين .. مش ح تفرق  
معاك .. إنما مع الحكومة ح تفرق .. واتنفس بأه على راحتك وشد  
أوكسجين على كيفك .. بالعكس إحساسك إنك دافع تمن ده ح  
يخليك تنفس بشكل أحسن .

\* \* \*

نيجي بأه للكباري والأنفاق اللي الحكومة صرفت دم قلبها  
عليها .. ده كله ليه عشان خاطر حضرتك .. رايح جاي ع الكباري ..  
شاييف الحديد والأسمنت وضارب طناش .. هي الحاجة دي مش  
بفلوس يا عم الحاج .. ولا الكباري دي نزلت من السما كده .. أنت لو  
دفعت ضريبة كباري .. مجرد مبلغ رمزي مش ح يأثر معاك .. كارنيه  
صغير باشتراك كده تجده كل سنه .. توريه بس للراجل اللي ح بيأه  
واقف على مطلع الكوبري .. وعدى يا سيدى براحتك .

\* \* \*

عديت طبعاً حضرتك على الكورنيش واتصورت تحت أسدين  
قصر النيل واستمتعت أنت والجو بتابعك بالوقفة ع الكورنيش ،  
وضربتوا دره وبطاطا وساعات بتوصل لكتشري .. وبحبك يا نعيمه ..  
وباموت فيكي يا نعيمه .. يعني أنت بتحب نعيمة أكتر من مصر !!

يا أخي حق كوز دره من اللي أنت نازل فيهم لغ أنت ونعيمه أديه



لبلدك .. واعتبرها ضريبة متعة .. زي نفقة المتعة .. ما أنت بتدفعها  
ورجلك فوق رقبتك لواحدة كانت مطلعه عينك .. ماتدفع لمصر  
يا أخي اللي متعاك ومهنياك ولا بتنطق ولا بتتكلم .

\* \* \*

نيجي بقى للعزاءات .. روح أي عزاح تلاقي أمم رايحة تعزي ..  
والكل عمال يشرب في قهوة .. وشاي وقرابيزي ميه معدنية تفضلاتيجي  
غيرها .. والعزا بيتصور فيديو .. وعيشه .

فيها إيه لو كل واحد راح يعزي دفع ربع جنيه ما بنقولش نص ..  
ربع جنيه بس ضريبة عزا .. يا أخي اعتبرها رحمة ونورع الميت ..  
بذمتك ما بتديش قدhem 10 مرات للسياس وانت بتركن العربية ..  
فيها إيه لما تدفع للدولة ربع جنيه وتتأه عزيت وعملت الواجب .

\* \* \*

نيجي بأه لبعض الضرايب اللي أنا شايف إنها بسيطة جدًّا ، وح تحلى  
مشاكل حقيقية .. ضريبة التخان .. طبعًا أي تخين بيستهلك مساحه  
من الأرض أكبر من أخوه المواطن الرفيع .. وطبعًا بيستهلك أكل  
أكتر ومية أكتر .. طيب .. ما يدفع ضريبة .. أي واحد يزيد على  
80 كيلو يدفع عشرة صاغ بس عن كل كيلو زيادة .. فيها حاجه دي ؟

تزعل دي !!

وفي الحاله دي ييأه التخين بيدي للرفع .. لأن الحكومة ح تاخد  
فلوس التخان مش عشان تضر بها في جييها .. ح تديها للرفيعين ..  
عشان يحصل التكافل في المجتمع .

\*\*\*

نيجي بأه لمجموعة من الممارسات اللي لو دفعنا عليها ضرائب ح  
تعمل حاله ترشيد وانضباط في المجتمع .. خليكوا معايا .

سعادتك طبعاً بتخش الحمام .. ده حقك كمواطن طبيعي وعلى  
الدولة إنها توفر لك ممارسة ده بكل راحة .. أهه .. عشان تعرفوا إني  
مش متحيز للحكومة .. إنها حضرتك .. كل ما تخش الحمام تقوم شادد  
السيفون وانزلي يا ميه في المجاري .. طبعاً أنتوا عارفين أن الصراع  
القادم هو صراع الميه .. ومع ذلك يا أخي بمتهمي الاستهثار .. ما  
نصدق نشوف سيفون نقوم شادينه ولا ضاربينه .. مزاج عندنا  
يا أخي .

أنا بأه فكرت في حل .. إحنا ندي المواطن حق شد السيافون أربع  
مرات في اليوم ، وأعتقد أن ده كافي جدًا .. أكثر من كده بأه .. لازم  
يدفع ضريبة السيافون أو ضريبة الكومبنيشن .. والمسألة بسيطة وح  
نقدر نحكمها .. ح نركب عداد على السيافون .. وكل أول شهر ح

يجيلك الرجال .

- صباح الخير .. عاوزين بس نقرأ السيفون لو سمحت .. ح ياخد  
قراءته ويقوم شادد السيفون عشان يصرفه .. أنت ما بتحاسبش على  
الشدة دي .

والله لقاك متتجاوز النسبة المقررة .. تدفع .. مافيهاش حاجه دي .

\* \* \*

نيجي بأه لعادة مصرية صميمة .. إنك بعد الغدا كده تقوم ماسك  
الجرnal وميل على الكتبة .. وتقيل شوية .. حلوه التقيلة بتاعة بعد  
الغدا دي .. لاحظ أن الساعتين دول أنت شخص غير منتج  
للمجتمع .. مقيل .. يعني الحكومة طافحة الدم عشانك وأنت رايح  
تقيل .. عموماً أنت حُر .. تدفع ضريبة وح نسميه ضريبة القيلولة ..

\* \* \*

نيجي بأه لضريبة العمر .. لاحظ إن صغيرين قوى وشباب زي  
الورد بيتطفووا وهم في عز شبابهم ، طيب أنت عايش ومتبت في  
الدنيا .. ده دليل على إيه .. على إنك مستريح .. ما تدفع ضريبة العمر  
الي أنت عمال تبرطع فيه ده .. هو لو لا الحكومة مظبطاك وواحدة باها  
منك كان زمانك لسه عايش !! ح تدفع عشرة جنيه بس عن كل سنة  
تعيشها فوق التلاتين .. مافيهاش حاجه وعنديك مهله تدفع فيها  
3 شهور من يوم عيد ميلادك .. أما بالنسبة للي ربنا ح يفتكره بدربي ..



فده طبعاً ارتاح واللي عايش هو اللي تعبان عشان كده ح ندفعه  
الضريبة مرة واحدة اللي هي (ضريبة المتوفى فجأة) ..

\* \* \*


نيجي بأه للضريبة اللي أنا واثق إنها لو اتنفذت مش ح نحتاج ملييم  
من بره .

طبعاً أنتوا عارفين أصل المشكله إيه ؟ الزيادة السكانية الرهيبة ...  
ودي من إيه؟! من كتر الخلفة .  
وكتر الخلفه ده جاي من إيه ؟ كلنا فاهمين طبعاً .

بيأه إحنا لو حددنا العلاقة بين الزوج وزوجته بعدد محدد من  
اللقاءات الشرعيه ونوزع دفاتر على البيوت .. كل واحد بيأه عارف  
حقوقه وواجباته .. لو اعتبرنا أن أيام الخميس كلها فري (مجاناً) ما  
تدفعش عنها أي حاجة والأجازات كلها فري ما هي عطلة رسمية ..  
من حق الناس برضه إنها تتبسيط .. نيجي بأه ليوم اتنين ولا تلات  
ولا أربع .. الأيام دي صابح تاني يوم شغل .. ما حبكتش معاك بأه ..  
والله اللي عاوز يمشي بكيفه وعلى مزاجه يدفع .. والدفتر موجود .

حد يسألني طيب والحكومة ح تعرف منين ؟ أقول له الحكومة  
بتعرف كل حاجه وال حاجات دي ما بتستخباش .

\* \* \*



أنا طبعاً عندي اقتراحات لضرائب كتير تانية .. بس أنا ما أحبس  
أثقل كاهل الشعب .. من ناحية الفلوس الحمد لله الفلوس موجودة ..  
المشكلة في الثقة اللي بين الشعب وبين الحكومة .. لو اتوجدت كل  
مشاكلنا حل.. وعشان نزرع الثقة دي .. أنا أقترح إن إحنا نفرض  
ضريبة على الناس اسمها (ضريبة الثقة) .. ودي نفرضها على  
المتشككين .. اللي دايماً بيحاولوا يطلعوا الحكومة غلطانة .. وأنا من هنا  
أعلن ثقتي العميماء بالحكومة .. وعشان أثبت لها إن ده مش كلام  
وبيس .. أنا كل أول شهري أطلع على وزارة المالية وح أسلمهم مرتبى  
بالكامل .. وهما يدوني مصروف جيبي .

\* \* \*

عزيزي القاريء .. آدي الضرائب اللي كنت مرعوب منها ..  
شاف سهلة إزاي .. أخف من شكة الإبرة .. ح تدفعها ومش ح  
تحس بيها .. بذمتك بعد ما قريت المقال .. مش حسيت إن الكلمة  
مش أبيحة .. شوف في البداية كُنا مش قادرین نقولها .. إنما دلوقت  
بعد ما ناقشنا الموضوع بمنتهى الموضوعية والتجرد .. أهوه .. أديني  
بقوها ومش مكسوف .. الضرائب وأنا واثق إنك مش ح تفهمني  
غلط .. مشكلة الكلام الأبيح مش في الحروف اللي بيكون منها ..  
المشكلة في نية اللي بيسمع .. يعني أنا كان فيه كلمه كده كنت عاوز  
أنا نقاشها معاك .. إنما خايف تفهمني غلط .. هي كلمة أبيحة برضه ..

أبيحه جداً .. إنها .. لو صبرت عليها .. يمكن تقدر تاخد عليها ..  
الكلمة هي .....  
يا ريت الأطفال يسدوا ودانهم (الانتخابات التزية) ..  
ح تلاقيها الصفحة الجاية على طول .



## خليهان زيهة

مشكلة التاريخ المعاصر اللي الأجيال اللي جايده ح تدرسه وتقراه على أنه حصل أيام زمان ، أنه خليط بين التاريخ والإعلام .. وعشان كده فيه عوامل كتيره بتتدخل في صناعة التاريخ المعاصر .. تخليه مليان أكاذيب وادعاءات ومغالطات أسمهم الإعلام في وجودها .. والأنظمة والحكومات.. والصحافة المرتاشية .. وأصحاب المصالح .. ومفيش شك أن تاريخنا فيها يختص بالانتخابات لو اكتب بالتفصيل وبدقة .. ومن غير تزويق ولا كدب .. كناح نقرأ أروع كوميديا في التاريخ .. ولا مولير بأه ولا برنارد شو ولا أعظم كاتب كوميدي على وش الأرض يقدر يكتب زي مهزلة الانتخابات الكوميدية .. ليه ؟! لأن فيها كل عناصر الكوميديا وأشكالها .. تقدر تعتبر الانتخابات مسرحية كوميدي وتقدر تعتبرها فيلم سهرة .. وتقدر تعملها سينما .. وتقدر تعتبرها مسلسل طويل .. وتسميه سنوات الضياع ..

والحقيقة حاولت أنا شخصياً - وغيري كتير حاولوا - أني أكتب عمل كوميدي عن الانتخابات ما هي ميغة كوميديا .. وكل واحد يقابلني .. يضحك ويقوللي .. هيء هيء .. ما تكتب لنا حاجة عن



الانتخابات .. وكتبت .. لكن الناس ما ضحكتش قوي .. ليه ؟ لأن الانتخابات الحقيقة في الواقع في بلدنا دمها أخف وتضحك أكثر بكثير من كل الأعمال الدرامية اللي انكبت عنها ، والكاتب منها كانت عقريته والممثل منها كان حضوره ما يجبيش حاجة في المرشح الأصلي اللي الحياه بتقدمهولنا وهو واقف يخطب في الناس .. يكتب ويمثل وينخرج كمان .

\* \* \*

خلونا نعترف إن أحنا ككتاب فشلنا في التعبير عن الأعمال الضخمة والأحداث المصيرية ، اللي في تاريخنا زي ثورة يوليو وزي حرب أكتوبر ، لما حاولنا نقدمها في أعمال درامية لأن الواقع دائمًا سابق الدراما .. وتفاصيل الدراما حتى لو اللي كاتبها شكسبير نفسه أقل من تفاصيل الواقع المذهلة اللي صعب جدًا إنك تقدمها بالحلاوه والعظمه دي .. والحكاية دي تنطبق جدًا على الانتخابات .. أو بتعبر أدق على كوميديا الانتخابات .

\* \* \*

وميراثنا الانتخابي فيه جمل كلاسيكيه لطشتها الدراما من الواقع ، وبأى مقررة على أي عمل درامي عن الانتخابات مثلًا زي الهتيفه بتوع الانتخابات ما يقعدوا يهتفوا للمرشح وهو عمال يبتسم ويحييهم .. أكليليشيات كلنا حافظينها صم .



- تنتخبو مين ؟! طلبه بيه

- وحبيكم مين ؟! طلبه بيه

- ابن الدايره ؟! طلبه بيه

وبرغم الهاتفات والزعيق والخناقات .. الناس غالباً بتتأهّل عارفه مين اللي حينجح في الآخر .. وهي دي روعة الكوميديا الانتخابية .. ناس بتهلل وبتزعق وبتختانق وبوليس واقف وإشراف قضائي .. ومشاهد فخمه .. كل ده والتّيجة معروفة من الأول .

.. وكلمة (نزية) في فترة الانتخابات تلاقيها من أكثر الكلمات انتشاراً في الصحف وفي وسائل الإعلام .. ومش عارف ليه مفيش كلمة تانية استخدمت غير (نزية) دي .. ليه مثلاً ماجينا شمرة قلنا انتخابات شريفه أو انتخابات صادقه .. أو واقعيه .. الظاهر إنّ كلمة نزية حلوه في البق ومربيه للكل .. بيأه نغيرها ليه إذا كان المرشح نفسه مش حيتغير .. بيأه خليها نزية .. علشان الناس ما تتلخبطش ..

\* \* \*

وفي رصيدنا السينمائي .. حيل كثيرة انتخابية تؤكّد للمشاهدين أن الإنتخابات لعبة غاية في السهولة .. وإن إحنا لو عاوزين نجيب واحد حنجيبه بصرف النظر عن الأصوات اللي حتنتخبه .. الأصوات دي مسألة ثانوية جداً .



عندك مثلًا في فيلم إسماعيل ياسين في الأسطول .. لماً أَحمد رمزي  
وعبد المنعم إبراهيم عملوا تامبولا عشان يكُسِّبوا إسماعيل ياسين  
وويلم حق المهر بتاع زهرة العلا .. حطوا الأوراق .. وكل واحد إدى  
صوته .. وياللا .. طلعوا الكسبان .. رجب وبعدين رجب راح فاتح  
بقية الأوراق .. لقاها كلها رجب .. رجب .. رجب .

يعني لو عاوزين ننجح حدح ننجحه .. بالتزوير حنجحه ..  
بالغش .. بأي طريقة .. طيب ما هم كانوا ممكن يلموا من بعض  
ويدوله .. لازمتها إيه الأصوات والأوراق ؟! وفي فيلم امبراطورية  
ميم .. العيال قايدين بثورة على أمهم في البيت وعاوزين يتخبو أحد  
يمسك البيت بدل أمهم .. وعملوا انتخابات .. وفي عملية فرز  
الأصوات في نهاية الفيلم .. ما كانش مكتوب غير .. ماما .. ماما ..  
ماما .. حتى الخدام كان كاتب الست هانم وده المفروض إنه صوت  
غير صالح يستبعد .. لأن فاتن حمامه كان رمزها الانتخابي ماما مش  
الست هانم .. ومع ذلك نجحت ماما .. زي ما نجح رجب بلعبه  
انتخابيه معروفة .

وبالشكل ده .. الناس في بلدنا .. أتأكدوا إن اللي جاي جاي سواء  
أنت رحت أديت صوتك أو ما رحتش .. يباء نروح ليه ؟ خليهم  
يجيبوا اللي هما عاوزينه يا عم .

\* \* \*



نخش بآه القصه اللي حصلت في بلد أرياف .. بلدنا .. مش  
ضروري نقول فين عشان محدش يزعـل .. خليها مفتوحة كده والـلي  
على رأسه بطـحـه يحسـسـ عليها .. حـقولـ بلد أرياف نـائيـة .. يعنيـ  
بعـيـدة .. عـشـانـ بعدـ عنـ الشـرـ وـنـغـنـيـلـه .. كانـ طـلـبـةـ بيـه .. فيـ بلدـنا .. هوـ  
رجـبـ .. رـجـبـ .. رـجـبـ وهوـ مـاماـ .. مـاماـ .. مـاماـ ..

في كل دوره الانتخابية .. وطلبة بيه كان عضو في حزب لا داعي  
لذكر اسمه .. لأنني لو قلت اسمه مش صح أكمل الحكاية دي من  
أصله .. وطلبة بيه أحسن وصف ممكن أو صفة بيه .. (موسيقار  
الأجيال) مع اعتذاري لحبيبي الأستاذ عبد الوهاب .. عشان كان في  
كل مرحله سياسية تلاقيه هو لسان الأمة .. وهو لسان الجماهير ..  
وهو اللي بيتكلم بلسان الشعب .. وطلبة بيه كان عنده فيلا في لسان  
الوزارة في مارينا ، وقالوا كمان إنه خريج ألسن .. وكان رمزه  
الانتخابي طبعاً (اللسان) .

وزي ما يحصل في الأفلام العربي في الآخر ليلي مراد لازم تتجوز  
أنور وجدي ، وطلبة بيه لازم يكتسح الانتخابات في الآخر برضه ..  
دي النهاية الطبيعية .. كل ده كويس .. وفُل .. لغاية ما جه البلد الحاج  
عبد الحميد .. وعشان ما اضيعش وقتكم في وصفه .. الحاج عبد  
الحميد أنا ح أو صفة بكلمه واحدة .. راجل مُخ .. صعب بل مستحيل  
تطلع فيه عيب .. الكمال لله وحده طبعا .. إنما الحاج عبد الحميد قدر  
يلم البلد كلها حواليه في لحظة .. والناس ابتدت تعرف من اللسان ..

وتميل ناحية المخ ومعاهم حق.. إحنا يعني كُنا أخذنا إيه من لسان  
طلبة خلينا في مخ عبد الحميد.

\* \* \*

الساعة 6 الصبح كان الباب يخبط على بيت الواد عوضين  
الفللاح.

- افتح يا عوضين .. افتح ياد يا عوضين .

- فيه إيه يا أخواننا .

- قوم ياد يا عوضين انت لسه نايم نامت عليك حيطة .

عوضين فتح الباب لقى قدامه عشرين تلاتين راجل من رجاله  
البلد .

- خير يا رجاله ؟

- إحنا مش جاين نتساهم معاك .. إحنا بس جاين نفكرك إن  
البلد كلها حتنتخب الحاج عبد الحميد المُخ .. وممشح ندى  
ولا صوت لطلبة بيه .

- لا إله إلا الله .. ما إحنا قاعدين في القهوة لحد الفجر كلنا واتفقنا  
على كده .. إيه الجديد ؟ جاين تعيدوهولي ليه تاني ؟

- جاين نعيدهولك عشان أنتوا مخكوا زنخ .. وجايزة حد من عند  
طلبه بيه يعدي عليك يلعب بدماغك وينخليك ترجع في اللي اتفقنا  
عليه .. ما هو لسانه حلو .

- أنا أغير كلامي !! أنا مش ح انتخب غير عبد الحميد .. كفايه  
نهب وسرقه وقلة حيا .. قال طلبة بيه قال !!

- طيب .. أدينا قولنالك .. وإحنا رايحين دلوقت نعدي على بيوت  
البلد .. عشان اللي معرفش يعرف .. واللي ناسي نفكره .

- استتوا أنا جاي معاكموا .. هوه أنا في ديك الساعة لما أخلص من  
طلبة بيه .

ولفينا البلد من ساسها لراسها .. شهر طويل عريض نخبط ع  
البيان ونقول نفس الكلام .

- افتح يا عم خضر .. زي ما فهمناك .

- ملعون أبو طلبة بيه يا أخي .. ده إحنا نموت .. نولع بجاز ..  
نسم بهايمنا ولا ننتخبه . كفايه بأه .

يا سلااام .. أول مرة بلدنا تباء إيد واحدة كدة .. أتابى الكل شايل  
في قلبه من طلبه وساكت .. الظلم له آخر صحيح .. وأنا قاعد بأفكر  
وبأشد كرسي دخان لوحدي لقيته داخل عليا .. مين .. عهاد زيادة ابن  
أخت طلبة بيه .. نزل من عربته .. وجاي لحد عندي .. والله وركبتووا  
عربات .. يا حافيين .. ده اللي كنت بآقوله لنفسي .

- نعم يا سيدى .. خير يا عهاد بيه ؟!

- خالي طلبة بيه باعتلك السلام .

- (قلت لنفسي) يا سيدى طظ .. (وقلت له) الله يسلمه يا سيدى .
- طلبة بيه بيقولك .. لو عاوز تكسب القضية بتاعة قيراطين الأرض اللي أنت رافعها على الجمعية الزراعية هو مستنيك بكرة ومعاه أكبر محامي شاددهولك مخصوص من مصر .
- (قلت لنفسي) آه .. لو أكسب القضية دى .. مشاكل كلها حل .. إنها .. لا .. أروح له إزاي .. ولو حد شافني وأنا رايح له من أهل البلد يتغوا في وشي .. لاً ما روحش .. يغوروا القيراطين مع القضية ع المحامي على طلبة بيه .
- الولية مراتي .. قالت لي لما حكت لها الموضوع ..
- يا راجل روح له .. أنت مالك بالانتخابات ولا بالسياسة .. ده البيت ما فيهوش العيش الحاف .
- كان عماد بيه واقف بره .. مستني الرد .. خرجت له .
- شوف يا عماد بيه .. أنا أجيله .. إنها ما أروحلوش البيت أنت عارف بلدنا وكلامها .
- يا أخي تعالله القهوة اللي في آخر البلد .. هوه مستنيك ومعاه المحامي بكره الصبح .

\*\*\*



أقول لكوا الحق .. طول الليل ما نمتش .. وأول ما الفجر طلع  
كنت طالع الطريق ، أصل القهوة اللي بيقعد فيها طلبة بيه دي  
متطرفة ولا نص ساعة أما تخرج من البلد .. والحمد لله .. محدثش من  
أهل البلد بيروح هناك .. وأنا واخدتها قزح كده على رجليا .. وخايف  
أشوف حد ولا حد يشوفني .. كأني سارق سرقة .. وعمال آخذ وأدي  
مع نفسي .. لو أديت صوتي لطلبة بيه ح يرجع لي قيراطين الأرض ..  
طيب والحاج عبد الحميد اللي كلنا واقفين معاه .. أسييه !! بعد ما قريينا  
فاتحة وادينا كلمه للرجاله؟! بعون الله الحاج عبد الحميد ناجح  
ناجح .. وإذا كان طلبة بيه عاوز صوتي وح يخلص لنا قضية الأرض .  
يبأه نديله الصوت اللي هوه عاوزه .. ما دام ح يعمل معانا مصلحة ..  
يعني هو صوتي أنا اللي ح ينجح الحاج عبد الحميد .. ما البلد كلها  
معاه .. جات على صوتي أنا!!!

\*\*\*

وأنا ماشي ع الزراعية وخلاص خرجت من البلد وداخل على  
العزبة اللي فيها القهوة اللي طلبة بيه مستيني فيها .. وأنا ماشي ..  
الاقيلك الواد مرعي شايل أمه لا حول الله على كتفه وماشي هو راخر .

- فيه إيه يا مرعي .. أملك ماها .

- أمي تعبانة .. مش قادرة تصلب طوها .

- وعلى فين بيها كده ؟



- رايح لطلبة بيه القهوة .. أصله لما عرف إن أمي تعبانة .. شدلي  
أكابر دكتور من مصر عشان يشوفها .

- ربنا ياخد بيدها يا مرعي .. أشيل معاك .

- لأنّ دي أمي .. أنا اللي أشيلها لوحدي .. ما هي راقدة بقاها خمس  
سنين في الدار إلا ما حد خبط عليها .. جاين دلوقت عاوزين تشيلوا .

\* \* \*

وشوية .. وأنا ماشي .. ألاقي الواد بكري راكب حماره وشارخ هوه  
راخر .

- على فين يا بكري .

- رايح لطلبة بيه يا خويا .. عندك مانع .. الواد عيان .. والراجل  
كتر خيره بعت جاب له الدوا .

- طيب يا بكري .. ربنا يوففك .

- ما تناوزش علياً وحياة أبوك .. كل حي يشوف مصلحته .

\* \* \*

وشوية .. وأنا ماشي .. إذ فجأةً .. ألاقي أهل البلد كلهم بيجرؤوا  
القهوة

- على فين يا إسماعيل .



- رايح لطلبة بيه .. فيه حاجة .

- وأنت يا بصراوي .

- طلبة بيه .

بأه البلد كلها طالعة تقابل طلبة بيه .. آه يا بلد بأه هو ده اللي  
حالفين ما تنتخبوه وبقالنا فوق الشهر رايحين جاين نشتم فيه .

- ما أنت رايح له أنت راخر ؟!. (ده أنا بقول لنفسي) .

ووصلنا القهوة .. كانت أمم واقفه هناك .. ناس غلابة ما صدقوا  
طلبة بيه بعتلهم .. ح يعملوا إيه ؟!

المهم باضرب بعينى كده ألاقيلك مين اللي قاعد جنب طلبة بيه !!  
والنبي ما قادر أصدق عينيا .. الحاج عبد الحميد المخ .. حتى الحاج  
عبد الحميد راح له !! ده طلبة بيه ده طلع سره باتع .. وعرفنا الفولة ..  
حاكم الحاج عبد الحميد كان عاوز يفتح شركة سياحة وواقفين له في  
التصاريح والموافقات والإجراءات .. وطلبة بيه الله يعمر بيته ويزيده  
كمان وكمان لما عرف .. بعتله وقال له .. أنا تحت أمرك .. ووعده  
يخلص له الموضوع .. قال جيتك يا عبد الحميد تعيني لقائك يا عبد  
الحميد مزنوقة أكتر مني ..

وطبعاً النتيجة معروفة .. كلنا أنتخينا طلبة بيه بالإجماع .. والشهادة

للله .. الانتخابات كانت نزية زي المرة اللي فاتت برضه .. وكل حاجه



حصلت في الانتخابات اللي فاتت بالمللي اتكلرت المرة دي .. نفس الافتافات والمؤترات والحفلة الكبيرة بعد النجاح .. وطلبة بييه مشي يسلم على أهل البلد برضه زي المرة اللي فاتت واللي كان بيرقص بالمزمار هوه هوه اللي رقص المرة دي .. والنبي كأن الزمن ما عداش وألف ألف مليون مبروك يا طلبة بييه .

\* \* \*

بالنسبة لقضية القيراطين بتوعى .. هيئ لسه في المحاكم ما انفصلاش فيها.. وباروح للأستاذ المحامي بتاع مصر ما راضيش يقابلني .. وطلبة بييه حاولت أقابله سبعتاشر مرة .. مش فاضي الله يكون في عونه حتى الأستاذ عماد زياده ابن أخيه محدث عارف يقابله راخر .

بالنسبة لأم الواد مرعي اللي كان شايلها ع الزراعية .. اتكلت على الله .. تعيشوا أنتوا بأهأ أهي ارتاحت وريحت برضه .

الواد بكرى بأه باع الحماره عشان يجيئ الدوا لابنه .. والدوا ما جابش نتيجة .. وبيقول إن طلبة بييه واعده ح يسفره بره يتعالج في ألمانيا !! وأهو مستنى .. أما نشوف !!

الحاج عبد الحميد المخ .. خد التراخيص وفتح شركة السياحة .. كام يوم وجم قفلوهاله بالضبة المفتاح ومحدث عارف ليه لحد دلوقت .. ناس بتقول عشان يحرم يرشح نفسه تاني قصاد طلبة بييه .

\* \* \*



وامبارح جات قناة اسمها الجزيرة تصور في البلد .. وأنا اللي  
اتكلمت .. والقهوة كلها شافوني في التليفزيون .. لما المذيع سألني عن  
الانتخابات قلت له ...

- يا باشا .. الانتخابات دى مفروض يلغوها من أصله .. ماهاش  
لازمة .. أنا شايف أنهم كل 4 سنين يعملوا حفلة مدو تجديد لطلبة  
بيه .. وياخدوها وهو قاعد في بيتهم .

قام المذيع سألني ..

- يعني الانتخابات كانت نزية؟!

رحت أنا ..... (طلعت صوت كده من مناخيري).

وراحوا قاطعينها بعد كده لما ذاعوا الحلقة .



## • طويل العمر والبال •

مفيش شك إن أغلي حاجة في الدنيا دي هي العمر .. عمر البنـي  
آدم .. والصراع على البقاء هو صراع الإنسانية الخالد .. شوفوا منظر  
الناس في أي طابور عيش تقدر تعرف اللي فلاسفة العالم كلـه ما  
قدروش يعبروا عنه .. كل واحد عمال يزق الثاني وكل واحد عاوز  
قنبـلة تنزل تاخـد اللي واقفين في الطابور وما ييقـاش فاضـل غيرـه .. يقوم  
واحد العيش وماشي ..

شوفوا مناظـر الناس لما يحصل زلزال ولا بيت يقع .. كل واحد  
بيجري عـشان ينـفـد بعمرـه .. داس على حدـباء وهو ماشي .. لـاش  
واحد بالـبوـكس كـومـه وجـري هـوـه .. يـالـلا .. اـجـري .. دـهـ العـمر  
واحد ..

لاحظـوا معاـيا الجـملـ اللي بنـستـخدـمـهاـ في العـزـاءـات .. لـمانـروحـ  
نعـزيـ في حدـ مـيـت ..

- تعـيشـ إـنـت ..



- البقية في حياتك ..

- العمر الطويل ليك ..

- الحي أبقى من الميت ..

مش ناقص غير إننا نقول جملة واحدة .. ياللا غار في داهية خد الشر  
وراح ، ورغم إن الموت مصاب أليم عند كل الناس فإن علم النفس  
بيقول إن كثير من الناس بيحسوا بلذة كده وحالة فرح غريب جواهم ..  
وإحساس غامض بالسعادة لما بيسمعوا إن فلان مات .. والسبب  
إحساسهم بإنهم لسه عايشين ما ماتوش .. عشان كده أنا كنت دائمًا  
أحب أقعد مع كبار السن والمُعمرین اللي عدوا التهانين والتسعين .. اللي  
عزوا في كل حبائهم وقرائهم وما لسه مشرفينا وما نسينا في الدنيا  
ولا كان حاجة حصلت ..

وفي مرة قعدت مع واحد عنده 104 سنوات .. الرجل لسه ماسك  
نفسه .. وينبط إيده في الحيط تطلع من الناحية الثانية .. أنا بس كان  
لي مضايقني منه إنه طول ما هو قاعد يطبطب عليا .. خلع لي كتفي  
ما هو لما مية وأربعة سنة ينبطوا على كتفك لما تكون إيه مش ح  
 تستحمل .. والمُعمرین دول عمرهم ما ادولنا روشة حقيقة تخلينا  
نعيش زيهم .. ومعظمهم عايش كده بركاوي .. وبيركبوا أخطاء  
صحية تقصف عمر أجدعها شاب .. إنها .. نقول إيه .. عمرهم كده  
باء .. الأعمار بيد الله .. الرجل قاعد بيشرب معسل قص .. والحجر

متغمض وشارب ييجي 17 كباية شاي عامل زي الخبر والكباية فيها  
ولا سبع معالق سكر .. ويَا أخِي لَا ضغط ولا سكر ولا أى حاجة  
وبيموت في هيفاء وهبي .. هي تطلع في التليفزيون وهو يفتح بُقه ..  
طبعاً مفيش ولا سنة في بُقه ..

وفي يوم قابلت واحد من المعمرين دول .. ما أنا أصلي غاويهم .. ما  
كانش كبير قوي .. كان عنده 93 سنة .. شد على إيدي جامد وأنا  
باسلم عليه وبرغم إن إيده دي عاشت في الدنيا قد اللي إيدي عاشته  
مرتين ونص إنما تحس إنه لسه مستلمها أول إمبارح .. كلابش حديد  
والله .. أكيد طن الحديد على أيامه كان بجنيه وربع .. قلت له بعد ما  
نبهته إنما ما بحبش حد يطبّب عليا ..

- قوللي يا حاج .. أنا عاوزك تحكيلي .. إيه بأه ..

قال لي ..

- أنا اتولدت في مغاونة سنة 15 .. أول ما اتولدت بأه ..

قلت له ..

- لا يابويا .. أنا عاوزك تختار لي الأحداث المهمة اللي أثرت على  
حياتك ما إحنا لو مشينا بالترتيب احتمال ربنا ما يكتبليش وأحضر  
نهاية الحكاية



قال لي ..

- على رأسى حاضر .. أول حادثة مهمة .. خناقة حصلت بيسي وبين واد معايا في الكتاب .. لما كنت لسه تلميذ .. أيوه .. أنا فاكر اسم الواد .. حاجييه أيووااه إسمه حمي .. كان واد قُزعة كده وبتاع مشاكل .. قاعد أنا في الكتاب .. الكلام ده بقاله بتاع 85 سنة دلوقتى وألاقيك كف على قفايا أعوذ بالله .. كرباج سوداني .. بالف .. لقيته هو .. حمي .. والله باكلمك وكأن اللي حصل ده حصل إمبراح .. بتضربني ليه يا حمي ؟! ده أنا اللي بأسأل .. ما لحقتش أكمل السؤال ولقيته راح مناولني بوكس في مناخيري جابت دم .. إزاي واد قزעה ما يجيش قد ركتبي .. يضرب بونية زي دي ! مش عارف لحد دلوقتى .. وقعت على ضهرى .. وهو نازل ضرب بالشلاليت .

- وسكت له ؟!

- كنت أقدر أقوم أعجنه عجن .. إنما الشيخ حسين الأستاذ بتاعنا كان واقف وأنا ما أقدرش أضربه قدام الأستاذ .. آه لو ما كانش الشيخ حسين واقف يوميها .. ثلاثة بالله العظيم كنت ضحضحته .. ودي كانت أول مرة في حياتى أسيب حقي .

- وبعدين ؟

- الحادثة الثانية بأه حصلت لي في التوجيهية .. كنا بنلعب كورة في حوش المدرسة وإحنا بنلعب .. الواد حمدان درديرى قاللى .. والله أنا

مكسوف أكرر الكلام اللي قاله .. نهاية قال لي كلمة أبيحة .. تخص والدتي يعني .. وأنا كنت شاب في عزي .. وطول بعرض .. رحت قايل له .. أهو إنت .. الواد ابن المجنونة نزل فيها ضرب كأنه بيضرب في حمار واقف في مطلع .. ده إنت اللي شتمت يا درديري الله يخرب بيتك ..

- وعملت معاه إيه ؟ !

- كنت أقدر أقطعه نساير .. إنما أنا متربi ومن بيت .. أهالينا ما ربوناش على كده .. آه لو ما كنتش متربi كنت عرفت أربيه .. إنما سبته .. وفي مرة بعد كده اتوظفت بأه .. وقاعد ع القهوة بالعب طاولة راح سليمان الفرماوي ماسك الطاولة وملبسهاني في وشي .. فجأة كده عشان اتغلب .. وراح ماسك كباية الشاي وهي مولعة نار وراح حادفني بيها .. أهو شايف آثار الحريق اللي في وشي ده تحت خدي .. أنا بيني وبينك فاض بيا .. ولسه ح أقوم بأه أفرّجه .. لقيت أبويا بينده عليا من البلكونة .

- أيوه !!

- أنا كنت باحترم أبويا جدًا .. كنا نبوس إيده أول ما نشووفه .. أنا شفت أبويا من هنا وكتمت اللي جوايا وأخذت بعضي ومشيت .. آه لو ما كانش أبويا ظهر ساعتها عليا النعمة كان سليمان ده اندفن في



- آه طبعاً طبعاً .

- بعد كام سنة خطبت واحدة .. وماشين أنا وهي بالليل .. طلع علينا أربع عيال صيع وراحوا شادين خطبيتي مني .. كنت لابس بالطوطقيل جدًا مخلي حركتي تقيلة .. حاولت أجري وراهم .. أدافع عن خطبيتي .. إنها البالطو كان معاكسنى .. آه لو ماكنتش لابس البالطو ده .. ودينى ما كانوا اترحموا مني .

- الله يخرب بيت البالطو ده يا شيخ ..

- جيت بأه بعد كام سنة اتجوزت .. ما هي دي ما كملتش معايا طبعاً .. المهم بعد شهرين من الجواز ألاقيلك مراتي داخلة عليا زي الجنونة .. وعمالة تضرب فيها بالشيشب وقلة حيا تخلي الواحد يخرج عن شعوره ..

- أخرج بأه يا عم أبوس إيدك .. وعملت إيه ؟

- ما قدرتش أسكط بأه .. لسه ح أجيبها من شعرها وأمسح بيها بلاط الشقة ألاقيلك أمي داخلة عليا .. أخ .. فلتت بنت اللذينه من إيدي .. ربنا بيحبها لولا دخلة أمي عليا كانت بأت ليتلتها سودة .. بس أنا ما قدرتش أزعّل أمي وعديت الموقف عشان خاطر أمي بس .. هوه فيه أغلي ولا أعز من الأم .. في يوم تانى نايم في أوضتني



لوحدى .. وألاقيلك حرامي داخل من الشباك .. حرامي داخل  
يسرقنا .. ح تعمل إيه لو كنت مكانى .. ما تجاوب ..

- لا يا حاج .. اللي إنت بتعمله ماحدش في الدنيا يقدر يعمله  
غيرك .. كمل .. كمل ..

- قلت أقوم أضربه بحاجة على دماغه أكومه على الأرض .. بس  
قلت لنفسي وافرض إنه مات .. القانون ح يسامحني .. وافرض  
القانون سامحني .. أنا إزاي ح أسامح نفسي بعد ما قتلت إنسان ..  
حطيت دماغي تحت المخدة وسيبته يسرق اللي هو عاوزه .. ربنا بأه هو  
المنتقم .. ولا إيه ؟

- ونعم بالله .. طبعاً طبعاً ..

- قامت مراتي لقيت الشقة مسروقة .. قعدت تشتم فيها  
وتضربني .. وتتف عليا .. ومش عاوز أخش في تفاصيل .. قلت  
لأ بأه .. ولسه ح أجيبها من شعرها علشان أمسح بيها بلاط الشقة ...

- راحت أمك داخلة ..

- لا .. أمري كانت الله يرحمها بقاها أكثر من خمس سنين .. إنت  
بتقاطعني ليه !؟

- أنا آسف .. اتفضل .. اتفضل ..



- مسكتها من شعرها ولسه ح أجر جرها .. ألاقيلك الولاد  
صحيوا جوه على صوتها .. طيب دول لما يشوفونا بنتخانق مش ح  
يطلعوا متعددين نفسياً ، آه لو ما كانوش الولاد صحيوافي اللحظة  
دي .. كنت وريتها النجوم في عز الضهر .. ما هو الواحد لازم يفكر  
برضه قبل ما يقدم على أي حاجة .. عندك مدير في الشغل .. ما  
كانش يبدأ يومه غير لما يبعث لي يهزأني قدام الموظفين كلهم .. مزاج  
عنه .. لغاية بأه لما الموضوع زاد عن حده .. قلة قيمة صحيح .. قلت  
أقدم فيه شكوى لرئيس مجلس الإداره .

- ماشي .. أهوده تصرف عاقل .. ومفيش أي حاجة تعطله  
لا أملك تخش ولا أبوك ولا الأولاد ..

- طيب وعداب النفس .. افرض إنهم رفدوه .. ح يعيش منين .. أنا  
بخاف من ربنا برضه .. آه لو ما كتش باخاف من ربنا .. كنت شطبه  
بأسئكة محيته من على ضهر البسيطة .. لحد بأه ما طلع لي سيادته في تقليعة  
جديدة بأه يعتلي كل يوم الصبح وأول ما يشوفني و .. اتفوروه ..  
تصور .. يتف عليا قدام الموظفين .. وهما يقعدوا يضحكوا .. هنا بأه ما  
قدرتش أمسك أعصابي .. ما هو صبر النبي آدم له حدود .. وحلفت  
ميت يمين لأننا ضاربه .

- أيوه كده .. كانت فين الثقه دي من زمان !؟



- إنما لو ضربته أكيد حيرفدني .. ولو اترفت ح أصرف على البيت والعيال منين؟! كلهم كانوا قطط لسه في المدارس .. أنا راجل عليا مسئوليات .. آه لو ما كانش عليا مسئوليات كنت قلتة مش ضربته .. وأهوه يا أستاذ .. عدت السنين وكل دول ماتوا .. وآديني عشت 93 سنة وأنا جايلك دلوقي .. قابلني واحد في الميكروباص .. من غير مناسبة كده قعد يترقب عليا علشان راجل عجوز يعني ومكحبح وماليش سنان .. عيل مش مترب .. ما كاناش كده إحنا خالص .. قلت له .. احترم نفسك يابني .. راح قايم وزاغدني حتى زغدة في كتفي .. شوف .. أهيء .. أهيء معلمة لحد دلوقي .. أنا طبعاً كان ممكن آكله بسناني .. وأعرّفه إزاي يحترم الناس الكبار .. إنما ..

- إنما إيه بأه يا حاج! خايف على إيه تاني .. ده إنت عشت 93 سنة!

- خايف على بكرة .. أنا لسه قدامي مستقبل خايف عليه .. ح أضيع مستقبل عشان خاطر واد تافه زي ده؟! الحشرات دي تسيبها تعدى من قدامك وتمشي إنت .. الواحد لازم يفضل باصص قدامه .. يعني أنا باعمل معاك الحوار ده مش عشان النهاردة .. عشان السنين اللي جاية .. أنا مرتب حياتي .. أنا في ألفين واتناشر ناوي أهاجر أمريكا عشان أبدأ حياتي هناك .. بقالي عمري كله بارتبا للحكاية دي .. كان ممكن أسافر قبل كده بكتير .. من تلاتين سنة ومن 20 سنة .. إنما أمريكا ما بتطلش حروب .. آه لو أمريكا تبطل حروب .. كان زمان بدأ حالي من زمان .. إيه رأيك .. أنا صحي ولا لا؟



قلت له وأنا حاموت من الغيظ ..

- شوف يابا .. عاوز تعرف رأيي .. عارف إيه أحسن حاجة  
تعملها دلوقتي .

- قول يابني ..

- تروح تضرب الواد حمي اللي ضربك بالقفاف من 85 سنة في  
الكتاب .. وأنا بعد اللي سمعته منك ده اتأكدت إن أيامي في الدنيا  
معدودة .. وبصراحة كده أنا عاوز أقولك كلمة أبيحه .. زي اللي  
قاها لك حمدان درديري تخصل الست والدتك .



## لفتنا الجديدة

وإيه اللي يجبرنا نعيش مع ناس لا إحنا فاهمينهم ولا هما فاهمينا ؟

نستحمل ليه يعني كلامهم الغريب وتعبيراتهم اللي تقع المرارة ؟!  
عشان إيه يعني ؟! علشان السفلة دول أولادنا ؟! وما عشان طلعوا  
لقو أنفسهم أولادنا ح يحرقوا دمنا ؟! شفتو العيال بتتكلم إزاي ؟!  
طريقة حقيرة في الكلام وجمل متركة غلط مش عارف جابوها منين  
وقال إيه .. مش عاجبهم كلامنا ؟!

نازل من بيتي لابس البالطو والковية وباقول لأمها "الجو ملبد  
بالغيوم" .. فيها حاجة دي قلت نكتة أنا ؟! تقوم مقصوفة الرقبة  
(بنتنا) ممسخة على روحها من الضحك ..

- بابي بيقول إيه ؟! ملبد .. ها ها .. ده بابي ده يضحك بشكل ! إيه  
الغيوم دي بأه .. ها ها ..

- آه ملبد بالغيوم يا جاهلة ياللي ما تعرفيش الألف من كوز الدره

مش شايقة السحاب وهو في السما .. مش عارفة الغيوم ؟!

- ما تقول (cloud) يا بابا وتخلاص .. لازم ملبد .. و .. بإيه؟! هو  
قال إيه يا مامي .. ها ها ..

- قلة حيا وجهل وتفاهة .. يا فرحة أمك بيكي !!!

ورحت رازع الباب ورايا وخارج .. عيشة تصرف !! ركبت  
عربتي وشغلت الراديو .. كانت المذيعة بتتكلّم .. وكل فين وفين  
على ما تقول كلمة عربي .. أنا افتكرت في الأول إني جبت إذاعة  
لندن !!

الإذاعة المصرية اللي كانت قلعة من قلائع اللغة العربية توصل  
لكده ! فين أيام الدكتور طه حسين (حد يفتكر الاسم ده دلوقتي من  
الجيل الجديد؟) آه .. اللي هو أحمد زكي في مسلسل الأيام .. كده  
عرفتوه ؟! لسه فاكر صوته وهو بيقول لغتنا العربية يسر لا عسر ..  
كنت أسمعه وهو بيtalk أحس بحلاوة غريبة في بقى .. ولسه فاكر  
فاروق شوشة بصوته الحنون وهو بيقدم برنامج (لغتنا الجميلة) ..  
لا ده ما كانش عربي اللي كنا بنسمعه ده .. كان جاتوه .. بغاشرة ..  
بسبوسة .. حببونا في اللغة العربية .. وما كانش نتصور إن حبيجي  
عليها يوم تنضرب الضربة السودة دي .. حد يقدر ينسى سليمان  
نجيب في فيلم غزل البنات وهو مفجوع في بنته ليلى مراد عشان  
سقطت في اللغة العربية .. وفاكرينه وهو بيوصي نجيب الريحاني

المدرس وبيقول له عاوزها تعطس باللغة العربية .



مع إن مصر أيامها كانت محتلة باللغة الإنجليزية .. الشيء الغريب إن مصر بعد ما قامت ثورة يوليو واستقلت والإنجليز سابوها ومشيوا .. خدوا معاهم اللغة العربية وسابونا نرطن بالإنجليزي ! لزوم الروشنة والاستايل والنيو لوك .. وببدأت الألفاظ الإنجليزي تفرض نفسها على كلامنا .

- أوكيه .. واي نوت .. سي يو .. نو بروبليم .. نيفر مايند ..

وبأه الكلام الإنجليزي في وسط العربي عامل زي الحشيشة الغربية في وسط النجيل .. أنا بنتي لما بتيجي تكلمني بأحس إنها عاوزتها أنيس عبيد جنبها عشان يترجم اللي بتقوله .. وياسلام على فرحة أمها وهي سامعة بنتها بترطن بالإنجليزي .. قاعدة تكبر وتقرها قرآن في سرها وحاطة إيدها على دماغها .. خايفة عليها من الحسد .. حتحسد على إيه ؟! دي خيبة بالويبة بأه أيام الاحتلال الإنجليزي تباء اللغة العربية ماسكة نفسها .. ولما يحصل الجلاء اللغة العربية تقع الوعقة السودة دي !!

وبعد رحلة تطعيم اللغة العربية بكلمات إنجليزية عندنا زيها في العربي بس بنستعيط .. دخلنا في مرحلة تانية وهي مرحلة الكلام الجديد .. اللي تحس فيها إن اللي بتتكلم قصادك عندها شلل مؤقت .. أو عاشت طول عمرها بره ولسه جاية في طيارة بالليل .. وهي مرحلة

تكسير اللغة العربية .. وببدأت الألفاظ تأخذ معاني عكسية ..



يعني مثلاً كلمة (فظيع) المفروض إن دي حاجة وحشة .. في كل قواميس اللغة العربية الفظاعة شيء مكروه .. فجأة على إيد شبابنا .. بأت حاجة حلوة بقدرة قادر .. يعني لو واحدة قالت لك إنت فظيع ما تزعلش .. دي بتلاغيك .. وكلمة (جامد) الجمود شيء بشع بأت ليها دلالة حلوة .. يعني لو واحدة قالت لك يا جامد مش قصدتها إنك عديم الحس زي ما بيقول مختار الصحاح .. لا .. قصدتها كويיס ..

نيجي بآه لكلمة مفروض مفيش خلاف عليها .. كلمة (موت) .. حد في الدنيا يستخدم الكلمة موت .. استخدام لطيف .. المانجة دي حلوة موت !! طيب تيجي إزاي ؟! لو الكلام ده إتقال من عشرين سنة تبأه المانجة مُسممة ؟! واللي ح يأكلها ح يموت !!

ده غير اللي قالت لي قريت كتاب جامد تنين .. قلتلها تنين إزاي يعني ؟! أول مرة أشوف حد بيوصف حاجة مبسوط منها يقول عليها تنين !!

التعبير اللي فاقع مرارتي .. اللي بآه موضة على كل لسان دلوقتي .. لما ييجي يوصف لك شخص كويיס .. يقولك إيه .. فلان ده .. حد جمیل .. حد مختلف .. حد إزاي ؟! مش عارفين تقولوا إنسان جمیل .. شخص جمیل .. إيه حد دي ؟! للدرجة دي مفيش كلام يعبر عن اللي

عاوزين نقوله ؟!



لاحظوا كمان انتشار كلمة (بجد) بين كل كلمتين في كلامنا  
لاحظت ده لما قارئة حبت تتكلم معايا وقالي ..

- إنت حد مختلف بجد .. وأنا بجد أول ما قريتك بجد حسيت  
بجد إنك بجد حد حقيقي ..

نيجي بأه لكلمتين بأوا على بق كل الأجيال الجديدة في لغتنا  
الجديدة .. كلمة (أساساً) وكلمة (أصلاً) .. وأنا الحقيقة مش عارف  
الكلمتين دول جم منين أصلاً أساساً يعني ..

مش عاوز بأه أخشن على الكلام إيه .. وألفاظ الشباب إيهها .. زي  
كبير ونفّض .. واحلق .. و... عشان كمان معدي مقلوبة .. ومش  
ناوي أرجع وأنا باكتب .. الغريب إنهم بيقولوا الكلام ده وهما  
مبسوطين وحاسين إنهم جابوا الديب من ديله ..

- طيب والحل؟!

ده أنا باقول لنفسي ..

- تفتكر فيه حل؟!

دى نفسي اللي بتقول لي ..

- أيوه .. إحنا اللي غلطانيين سيناهيم الخبل على الغارب لحد ما  
ضيعوا اللغة العربية وكلها كام سنة وح يروشنوا البلد كلها .. وح تباء



دي هي اللغة الرسمية اللي الدولة ح تتكلم بيها .. وسرحت وتخيلت مصر بعد 20 سنة ورئيس الوزارة بيخطب في الشعب .

القاعة كلها عمالة تصفر وتصوت زي ما يكون مايكل جاكسون اللي واقف مش رئيس وزرا .. هووو .. هووووه ..

طلع رئيس الوزرا لابس بنطلون ساقط وبودي .. وقعد يرمي بوس على الشعب الروش ..

- قشطة !!

الشعب كله قال ..

- قشطة !

- شوفوا بأه يا جماعة .. أنا عاوزكوا تنفضوا الكل مشاكلكوا ..  
نو بروبييم أوكيه ؟!

- أوكييه .

- إحنا عاوزين نعمل تشانج (change) شوية في أوار لايف ..  
الحياة بأت بورينج (boring) قوي .. واي نوت ؟  
- واي نوت ..

- أنا النهاردة جاي عشان أقولكوا يا جماعة .. أسماء الوزراء اللي عينتهم في الوزارة الجديدة .. آر يوريدي ؟!

- ريدي ..

- أنا أخذت تامر وزير الصناعة .. وده حد جمبل .. حد مختلف ..  
وما كانش عاوز يبأه وزير أساساً أصلًا يعني .. كان مكّبر .. ومنفصنع  
الآخر .. ....

وافت من السرحانة المرعبة دي .. اللي قلقتني على مستقبل مصر ..  
وأخذت بعضى وجريت ع البيت .. الحق البنت اللي ح تضيع مني  
دي .. أديها شوية عربي قبل ما ربنا يفتكرني ..

\* \* \*

قعدت معها .. وحاولت قدر استطاعتي إني أمسك أعصابي ..  
عملًا بنصيحة أمها إن بنتنا ما بتجييش بالضرب ..

- اتكلم معها .. اقنعها .. بالعقل ..

- حاضر يا ستي .. نتكلم بالعقل ..

- يا بنتي يا حبيبي .. إنت النهاردة في رابعة ابتدائي ..

- في 4 year يا بابي ..

- آه .. نسيت إنك في المدرسة البريطانية .. ماهى ييرفور .. دي

هي رابعة ابتدائي عندنا ..

- (مندهشة) يااه .. Realy ..

- أيوه .. واسمي يعني بأه عشان ابتدت أتعصب .. اللغة العربية يا بنتى اللي إحنا بتتكلم بيها دي هي اللغة الأم .. لغة بابا وجدو وجده .. اللي كانوا عايشين قبل حضرتك ما تشرفيني بمئات السنين .. واللغة دي حاجة لازم نحافظ عليها ونحبها .

- بابي يو سبيك تو مي كان آي كانت سبيك آرابيك ؟ !

- اللغة اللي بتتكلميها دي لغة حقيرة وقبل ما ألطشك بالقلم على بوزك .. لازم لما تتكلمي ما تقوليش ولا كلمة إنجليزي .. مفهوم ؟

- أوكيه داد ..

رحت ماسك الجورنال وراميه قصادها .. ورحت خابط خبطتين بالمسطرة على الترابizza .. وعينيا بتطلع شرار .. واديتلها الجورنال .

- طلعي فعل مضارع من اللي مكتوب قدامك في الجورنال .. ياللا.

قعدت البنت تبص في الجورنال وهي مذهلة كأنها بتقرأ في جورنال ياباني .. روحت زاغدتها زغدة محترمة في كتفها .

- إيه الخيبة دي ! مش لاقيه فعل مضارع في كل ده يا بنت !! إدينني فعل مضارع ..

لاحظت إن وشها البرئ ونظراتها الطفولية في عملية البحث عن فعل مضارع كانت بتدور من الشمال لليمين .. قلت مش ح يضبط

البنت دي غير قلم محترم على وشها من اليمين للشمال ..



كان الصراع الداخلي جوه البنت المذهلة بيدور حوالين قوايا  
العقلية اللي تخليني حريص قوي كده إني ألاقي فعل مضارع دلوقتي  
حالاً .. وحتى لو لقتيه ح أعمل بيه إيه ؟! وإيه أهمية حاجة زي دي  
لراجل ربنا كارمه في حياته ومحوش قرشين حلولين وعمره ما بيتأخر  
عليها في أي طلب من طلباتي.. وكان صوتها الداخلي بيقول .

What happened to dad?! –

He became crazy!! –

ولما يأصل تمامًا من إنها ح تقدر تطلع لي الفعل المضارع اللي أنا  
عاوزه .. وحست إنها اتنقت .. وإنني ما باهزرش .. وحارثها علقة  
محترمة لو ما جابتش الفعل المضارع من تحت طقاطيق الأرض ..  
راحـت بصـالي بـصـة فـيهـا ذـل وـاستـكـانـة .. بـصـهـ تـاخـدـ القـلـب .. وـتخـلـيـ  
الـواـحـدـ يـتعـاطـفـ مـعـاهـاـ وـالـدـمـعـةـ تـفـرـ منـ عـيـنـيـه .. وـدـهـ يـؤـكـدـ إـنـ الـبـنـاتـ  
بيـتـولـدواـ وـجـواـهمـ هـرـمـونـاتـ الصـيـاعـةـ .. مـشـ بـيـكتـسـبـوهاـ ..

وـقـبـلـ ماـ أـضـعـفـ قـدـامـ بـصـتهاـ الـأـنـثـوـيـةـ الليـ ماـ اـعـرـفـشـ جـابـتهاـ منـينـ ..  
دوـرـتـ وـشـىـ عـشـانـ أـتـفـادـاـها .. وـصـرـختـ بـآـخـرـ ماـ تـبـقـىـ لـيـ مـنـ قـوـةـ ...

– فـينـ الفـعلـ المـضـارـعـ يـاـ بـلـيـدـةـ ؟!

وـفـجـأـةـ .. رـاحـتـ قـايـمةـ .. وـبـاـيـسـانـيـ فيـ خـديـ .. بـوـسـةـ مـفـاجـئـةـ ..  
غـدارـةـ .. مـبـاغـتـةـ ماـ كـوـنـتـشـ عـاـمـلـ حـسـابـهـ .. بـوـسـةـ طـمـتـنـيـ عـلـىـ مـسـتـقـبـلـ  
الـبـنـتـ فـيـمـاـ يـخـتـصـ بـحـيـاتـهـ الـأـسـرـيـةـ بـعـدـ كـدـهـ إـنـ شـاءـ اللهـ .. وـقـلـتـ لـنـفـسـيـ ..



- البت دي إحنا نجوزها في خامسة ابتدائي ونخلص ..

لكن برغم كده ما استسلمتش لإيماني بحبى وارتباطي باللغة العربية ورحت صارخ فيها ..

- ح تطلعى الفعل المضارع يعني ح تطلع عليه .. وإلا ليتكم مش فايتة ..

ولما فهمت البت كويس إن أنا مش من النوع ده من الرجال وإنى ما تخيلش عليا الحركات القرعة دي .. بدأت تركز في الجورنال وتدور .. وأخيراً .. وبعد نص ساعة عمالة تفلي الجورنال قالتلى الشملولة ببراءة خبيثة ..

- هو مضارع يعني إيه يا دادى !؟

لاحظوا قدرتها الفائقة على الاستدراج .. البت بتجر جرنى في الكلام عشان في الآخر أنا اللي أطلعه لها زى كل يوم .. ما أنا برضه اللي باحل لها واجب العربي .. إنها المرة دى أبداً ..

راحت مقربة مني وحطت إيدها على كتفى وقالتلى ..

- بابي .. إنت حد جميل .. حد مختلف .. وأنا أصلًا أساسًا ما بحبش العربي .. ما تنفض بأه حضرتك للمضارع ده .. أوكيه داد ..  
قشطة !

طيب أقوها إيه دى !!



## ♦ النواصل مع الشباب ♦

مفيش شك إن الشباب هما اللي بيحتلوا الكون كله .. وكلمة  
الشباب كلمة سحرية بنقولها بفخر أحياناً ..

- أنا في عز شبابي وفي عز قوتي ..

ونقولها في حسرة أحياناً ..

- أنا لما كنت في شبابي وقوتي ..

وننافق فيها بعض أحياناً ..

- يا عم إنت لسه شباب ..

ونعقد فيها بعض أحياناً ..

- إنت فاكر نفسك شاب؟!

والشاعر العربي بيحسم القصة كلها ويقول ..

- «ألا ليت الشباب يعود يوماً» ..



وأي كاتب في الدنيا بيأه حريص دائمًا إنه يلم حواليه الشباب ..  
وأحسن لقب لكاتب في العالم يسعده .. إنه بيأه كاتب الشباب ..  
ومرحلة الشباب هي المرحلة اللي النشاط الإنساني كله رايحلها ..  
ومتوجه ليها ..

ماتشتات الكورة .. أفلام السينما .. الصحف .. المجالات .. الكتب ..  
والأغاني .. كلها رايحة تخاطب الشباب .

قال لي أحد الناشرين وهو بيقطمني ..

- مبيعات كتبك لازم تراجع طبعاً .. عشان إنت قافل على نفسك  
وبعيد عن الشباب .. اللي إنت بتكتبه ده أنا ما انكرش .. أدب رفيع ..  
له قيمة .. إنما .. الشباب في حلة تانية خالص .. لازم تعرف لغة  
الشباب الجديدة .. الدنيا اتغيرت .. دلوقتي فيه الإنترن特 .. وفيه  
الفيس بوك .. والشباب هما القوة الشرائية الأساسية دلوقتي .. الجيل  
الي كان بيقرالك خلاص بطل يقرأ وبطل يشتري كتب .

ما اعرفش ليه والناشر بيكلمني حسيت إني كنت قاعد جنب أحمد  
لطفي السيد في التختة زمان وإنني لازم أطلع كارنيه المحاربين  
القدماء .. يا عم إنت شايفني مش قادر أصلب طولي .. ما أنا كمل  
جمهوري من الشباب .. وبعدين إحنا لسه بصحتنا يعني وبنشرب

معسل وشغالين ..

دخل رجل كبير في السن وقعد قدامنا في الكافيتريا .. كان ماسك في إيده كتاب بيقرأه وفجأة ابتسم لي .. وشاورلي بالكتاب .. كان واحد من كتبني .. وقال لي ..

- ممكن تمضيلي على الكتاب ؟

- يا سلام .. قوي .. قوي .. والله ما إنت قايم .. أنا جاي لحد عندك أمضيهولك ..

مضيت له إهداء على الكتاب كتبتله فيه «إلى القارئ الحبيب الذي أتى لي في الوقت المناسب».

ورجعت للناشر وقلت له ..

- هه .. أهوه .. وتقول لي الناس بطلت تقرالي !!

قال لي ..

- ده راجل معدى السبعين سنة .. يعني ده لو قرالك السنة دي مش ح يقرالك السنة الجاية .. ده رجله والقبر .. أنا عاوزك تجدد جمهورك .. عاوزك تلم العيال اللي طالعة جديد .. أنا عاوزك تكتب لبكره ..

وفجأة واحنا قاعدين .. لقينا الرجل الكبير اللي مضيته على الكتاب

بيضحك .. مسخن على روحه من الضحك ..

قلت للناشر ...

- أهوه .. الرجل بيقرأ كتابي وميت من الضحك .. يعني إحنا لسه  
برضه بنعرف نكتب كوميدي وساخر .. ما تقلناش !!

الراجل اللي كان بيقرالي قعد يضحك لحد ما بدأ يكح .. وجات له  
شرقه .. جرينا عليه قعدنا نخبط على ضهره .. وجيئناله مية .. خفت  
على القارئ الوحيد اللي باقي يفicens مني ما هو ده لو اخطف متنا  
دلو قتي .. ح أكتب لمين تاني من بعده؟! .. ده آخر واحد ..

\* \* \*

وشوية .. ودخل شاب شيك استايل .. عامل سكسوكه ولابس  
كاجوال وراح جاي عليا كده من نفسه قدام الناشر وقاللي ..

- ياما إنت كريم يارب .. شاب ده ولا مش شاب؟! (ده أنا باقول للناشر).

- إحنا يسعدنا ويشرفنا إنك تكون سبeker في جمعية شباب الغد في  
الحملة السنوية لأنك حصلت على لقب أقرب كاتب لقلوب الشباب  
بعد الاستفتاء اللي عملناه على النت والفيسبوك .

ياااه .. ده أنا ابن حلال مصفي .. الواد ده نزل لي من السماء ..  
والناشر اتكبس حته كبسه .. آدي الشباب أهم .. جايين عشان يعزموا  
كاتبهم المفضل على الحفلة اللي اختاروه فيها **كاتب الشباب** ..

بطلوا بأه شغل الناشرين ده يا أخي .. يا سيدى مش عاوزين  
فلوس منكوا بلاها النسبة اللي بناخدتها خالص .. إنما ما تحبطوناش ..  
ما تكسر وش مقاديفنا ..

هو ده التواصل الحقيقى بين الأجيال .. بصيت للشاب اللي جه  
أنقذني من تقطيم الناشر وقلت له بحنان ..

- والخلفة إمتنى يا حبيبي .. أصل أنا ما أقدرش اتأخر عن الشباب  
أبدًا ..

الشاب قدم لي الدعوة .. كان مكتوب فيها .. ندعوكم لحفل تكريم  
كاتب الشباب الأول يوسف معاطى على ظهر الباخرة بلومارين عند  
مرسي المعادى فى رحلة نيلية على العشاء .. الحضور بالملابس  
الرسمية .. الدعوة شخصية .. وتحت بخط صغير كان مكتوب ..  
قيمة الدعوة خمسين جنيهًا!! استغربت جداً لما قررت المبلغ .. معقول  
عاملين الدعاوى بفلوس؟! هل فيه حد ممكن يدفع خمسين جنيه  
عشان يحضر حفلة تكريم كاتب الشباب؟!

الشاب ابتسم وقاللي ..

- حضرتك مستغرب عشان المبلغ يعني .. أصل إحنا عاملين  
نشاط خيري في الجمعية والفلوس دي بتروح لدار أيتام .. وبعدين  
اسم حضرتك على الدعوة ح يخلي الشباب يدفعوا أضعاف المبلغ ده  
عشان يشوفوك ويقعدوا معاك ..

حطيت الدعوة في جيبي وقلت للناشر ..

- سامع بيقول إيه ؟! ياللي عمال تقطمنى من الصبح ؟!

وقلت للشاب ..

- عموماً أنا بأشكركم إنكم افتقربتموني وح أحاول آجي طبعاً.

قال لي ..

- لو حضرتك عاوز دعوة تانية .. اتفضل .. أنا معايا دعوات  
كثير .. أكيد فيه حد يحب ييجي مع حضرتك .

قلت له ..

- أوكيه .. هات كمان اتنين .. ومرسيه قوي .. إسمك إيه بأه ؟

- أنا نادر نور الدين مقرر اللجنة الثقافية بالجمعية .

- فرصة سعيدة يا نادر .

- أنا أسعد يا أستاذنا .

- أقعد .. أقعد يا نادر .. تشرب إيه ؟

وقد نادر .. الولد فيه حياء وخجل وشعرت إنه حاسس تجاهي  
برهبة كده .. فكرني لما راحت قابلت إحسان عبد القدوس زمان ..  
كنت مكسوف كده وخايف زي نادر بالظبط .. أكيد نادر ح يحكى  
الحكاية دي لأصحابه بعد ما يسيبني .. ده أنا بعد ما قعدت مع إحسان

فضلت تلات سنين أحكىها .. ح يقول لهم طبعاً قد إيه أنا إنسان  
بسقط .. وعادي جداً .. ومتش تنك ..

وشرب نادر الشاي بسرعة .. وراح قائم ..

- طيب .. تسمحلي بأه يا أستاذنا .. لازم أمشي .. ح نستني  
حضرتك .

- أكيد جاي .. جاي يا نادر ما تقلقش .

وقف نادر وقعد يبص لي .. وأنا مش فاهم ..

- فيه حاجة يا نادر ؟!

- أباء أعدى على حضرتك إمتى عشان آخد فلوس الدعوات  
الـ 150 جنيه ؟

قلت له ..

- بتوع إيه ؟ آه .. أصلی ما آخذتش بالى من اللي مكتوب على  
البطاقة .. هي الواحدة بخمسين جنيه .. آه ..

ورحت حاطط إيدى في جيبي ومطلع الدعوات ..

- متهيألى مش ح ألاقي حد ييجي معايا .. خد دول يا نادر ..  
(واديته دعوتين) .. أكيد ح تلاقي ناس كتير عاوزة تروح التكرييم ..

كفاية دعوة واحدة .. آه .. هي الحفلة قلت لي إمتى ؟!

- يوم الخميس !!

- ياه .. ده أنا مرتبط يوم الخميس .. عندي موعد في منتهي الأهمية .. مش ح أقدر آجي يا خسارة .

- مش ممكن يا أستاذنا .. الناس كلها جاية تحتفل بيكم ودافعين فلوس كلها رايحة للخير معقوله تبأه سبب في منع الخير عن الناس !

آخر جنى إنسانياً .. ما كانش قدامي غير إني أطلع الخمسين جنيه وأديهومله .. مش إشكال يعني لما الواحد يدفع خمسين جنيه في حفلة معمولة مخصوص علشانه ..

\*\*\*

في البيت .. المدام لقيت الدعوة في جيبي .. وهي بتقلب الجاكيت .

- إيه ده !؟

- لا .. دي حفلة تكرييم عاملينهالي الشباب بعد الاستفتاء اللي حصل .. مش أنا بآيت كاتب الشباب الأول .

- وح تروح لوحدك !؟

- آه طبعاً .

- وإننا ما نجيش معاك ليه !؟

- إنتوا مين !؟

- أنا والعیال .

- لا يا ماما .. دي حفلة معمولاً مخصوص .. والتذاكر طبعاً  
اتباعت .

- حفلة بتذاكر ! . إزاي ؟ !! ومين حمار يقطع تذكرة عشان يحضر  
حفلة تكريم ؟ !!

آه .. دي مشكلة كل العباقة اللي في الدنيا .. إن زوجاتهم غالباً ما  
بيأوش عارفين قيمتهم .

\* \* \*

يوم التكريم .. رحت على الحلاق وهو بيحلق لي دقني قلت له ..  
نعمها كويس يا جمبل .. النهاردة أصلهم ح يكرموني .. وفيه كاميرات  
ح تيجي تصور .. أصلهم .. انتخبوني كاتب الشباب .

- ألف ألف مبروك يا أستاذ .. ما أخدناش الحلاوة ..

وطلعت على المعادي بالبدلة الرسمى .. والكرافاته .. وقادم  
المرسي .. كان فيه عدد كبير جداً من الناس واقفين .. كلهم لابسين  
رسمى زي بالظبط ..

طبعاً دول الجمهور اللي جاي يحضر الحفلة .. الغريبة إن ماحدش  
فيهم كان بيتص لي .. ده أنا العريس .. ده أنا نجم الحفلة .. آدي

مشكلة الكتاب إن الناس غالباً ما تعرفش شكلهم إيه .. لو كنت مثل  
ولا لعيب كورة كانوا اتلموا عليا .

الأغرب إن اللي واقفين ومطنشيني دول .. كلهم أعمارهم كبيرة ..  
في سني وأكبر مني كمان .. أمال فين الشباب ؟ !

\* \* \*

كانت فيه عربية شرطة واقفة .. والناس اتلموا عليها .. الظاهر إن  
الداخلية عرفت بمسألة تكريمي .. فبعثت قوات لتأمين المكان ..  
ييجي الأخ الناشريشوف .. ييجي يتفرج .. طيب وديني وأيماني  
الكتاب اللي جاي لأننا رافع نسبتي اللي باخدتها منه .

\* \* \*

قربت من الضابط وقدمت له نفسي ..

- أنا الكاتب ..

قال لي ..

- عارف .. بتسائل عن مركب البلومارين ..

- أيوه .. أصلهم عاملين لي تكرييم عشان ...

لقيت الضابط راح مصرخ ..



- يا جماعة .. معقوله .. ده إنتوا ناس مثقفين .. يتتصب عليكم بالسهولة دي .. دول شوية عيال صيع .. لا فيه جمعية ولا تكريم ولا استفتاء ولا أي حاجة .

بصيت حواليا .. لقيت الناس اللي واقفين كل واحد معاهم دعوه ..  
بصيت في واحدة منهم .. نسخة طبق الأصل من الدعوة اللي معايا  
بالضبط.. الفرق الوحيد إن اسمى مش مكتوب .. كان مكتوب مكان  
اسمي .. اسم تاني .. حسين عبد المجيد .. قاص وروائي .. والفائز في  
استفتاء كاتب الشباب الأول .. وبيومي عطا الله .. شاعر الشباب ..  
وسليم عبد الفضيل أديب الشباب الأول .. كل دول كتاب وشعراء  
وكلهم جاين علشان يتكرموا من الشباب .. إنما .. للأسف ما لقيوش  
الشباب .. أو بتعبير أكثر شبابية .. الشباب حلقوهم ..

\* \* \*

رجعت البيت ولما سألتني مراتي عن الحفلة .. والتكريم وإزاي  
الشباب استقبلوني قلت لها ..

- مش عارف ليه حاسس إن فيه عدم تواصل بيني وبين الأجيال  
الجديدة

وبالليل .. كلمني الناشر ..

- هه عملت إيه مع الشباب !؟

ما عرفتش أقول له إيه !؟ .. إنما بصراحة كنت عاوز أقول له ..

كلمة أبيحة ...

## الراجل اللي بيحدد شمال

على طول الحياة .. نقابل ناس ونعرف ناس ونرتاح وياناس عن  
ناس .. إنها فيه ناس بآه .. أعود بالله .. ممكن تقابلهم مرة واحدة في  
حياتك بس يسيبوا علامة لا يمكن تنسى ..

مش ممكن أقدر أنسى الراجل اللي كان واقف جنبي في الأتوبيس  
وأنا طالع على التجنيد يوم ما راحت الجيش عشان يجندوني .. قالولي  
قبل ما أروح إني مش حتجند لأن عندي فلات فوت في رجلي ..  
وفجأة وأنا واقف لقيت الراجل اللي جنبي برجليه اللي زي المكواه  
الحديد راحت نازلة على رجلي .. وبإيه .. بعزم ما فيه .. من كتر الوجع  
ما قدرتش أصرخ .. بأت الصرخة اللي تطلع مني لجوه .. آه .. آه ..  
ولا كأن وابور زلط عدا على رجلي .. ربنا كرماني بمطب .. الراجل  
وقع على اللي قاعد في الكرسي اللي قدامه بطنه .. وأنا بصيت لرجلي  
لقيتها عاملة زي حته العجينة قبل ما تخش الفرن .. يعني حتى لو ما  
كانش عندي فلات فوت .. بآه عندي فلات فوت .. يباءه نتوكل على  
الله على التجنيد ناخد الإعفاء ونبداً مستقبلنا .. راحت كشفت ..

لقيتهم قبلوني .. ومش عسكري .. لأظابط كمان .. طيب إزاي ..  
والفلات فوت ؟! أتاري الراجل أبو رجل زي وابور الزلط .. لما داس  
على رجلي .. عدتها .. يباء أنسى راجل زي ده إزاي !!

\* \* \*

مشكلة أى كاتب إن المادة الخام اللي بيشتغل بيها هي الناس ..  
يعني لازم عشان تكتب تعيش .. واللي يعيش ياما يشوف .. طيب  
عاوزيني أشوف وأسكت .. ما هو أنا لازم أتكلم عن الناس ..  
ويزعلوا يزعلوا بأه.. ما أنا لو ما كتبتش حاطق .. ح افرق .. والكتابة  
برضه لازم يباء فيها شيء من الندالة وقلة الأصل .. واللي أنا ح أكتب  
عنهم أهم عارفين نفسיהם .. واللي على رأسه بطرحه ومش عاوز  
يحسّس عليها .. يسيبني أنا أحسّس ..

\* \* \*

كانت الدنيا ليل .. وأنا ماشي في بلد أرياف والشنطة في إيدي ..  
والظروف أجبرتني إني أبات في البلد دي عشان كان عندي ندوة تاني  
يوم الصبح .. طبعاً كل العواميد مطفية مفيش غير نور القمر يادوب  
يخليك ت Shawf طشاش .. مع صوت الضفادع وهو هوة الكلاب ..  
ومفيش صريح ابن يومين أسأله على أي لوكاندة أبات فيها الليلادي ..  
وفجأة شفت من بعيد اتنين واقفين قدام دكان بقال فاضي خالص  
وقال إيه مكتوب عليه «ألف صنف» .. قربت منهم .. وقلت لهم ..

- مساء الخير .. ألا مفيش لوكاندة قريبة من هنا يا إخوانا ؟
- آه .. لوكاندة الحاج عرفان .. اللي منورة هناك أهيه .
- الثانى اللي واقف بص لي وابتسم وهو بيشهه علينا .. وقال لزميله ..
- والنبي باينه هوه ..
- لا يا سيدى مش هوه .. وده إيه اللي ح يحبه بلدنا .. هما اللي زي ده فاضيين لنا !!
- والله العظيم هوه .
- يا أخي دوكها جرم عن ده .
- يا سيدى هو بس امقت شوية ..
- ولقيته جاي جرى ورايا ..
- ألا الأخ لامؤاخذة .. مش إنت .. تبأه .. إنت .. ولا مش إنت ؟
- أيوه .. أنا اباء أنا .. ما اباش أنا إزاي يعني ؟!
- ماقصدشي .. أنا يعني عاوز أقول .. مش إنت تبأه هو ؟!
- هو مين ؟!
- اللي هو إنت .. إنت مش بتمثل باين ؟!
- لأ .. يباء إنت قصدك على حد ثانى ..



- بس .. إنت بتقرأ النشرة في التليفزيون؟!

- وده كان حد تالت ..

- بتذيع ماتشات الكورة ..

- يا سيدى أنا ولا واحد من دول ..

- بس افتكرك .. إنت بتكتب .. بتتألف يعني .. أية شفتك مرة في الجورنال واقف جنب الزعيم .. يا أهلاً وسهلاً .. دي البلد نورت واللهى .. أيوه كده أنا جمعت .. وبتكتب كان في الجراني .. على فكرة أنا باقرالك علطول .. مفيش كلمة كتبتها ما قريتهاش ..

\*\*\*

أظن مفيش حاجة تخللي كاتب يزأطط قد اللي أنا باسمعه ده .. في بلد أرياف وبالليل والدنيا ضلمة مع صوت الضفادع وهو هوة الكلاب وعواميد النور مطفية وتلاقي حد يعرفك؟!! طيب لما واحد ما يتآلطش في موقف زي ده أمال يتآلط إمتي؟!!

\*\*\*

- تعالى يا باشا أنا أوصلك لحد اللوكاندة .. اتفضل .. يادي النور .. ده إحنا نشرف .. عنك الشنطة .. ثلاثة بالله العظيم ما شايلها إلا أنا ..

\*\*\*



يا سلام بأه على القراء لما يسعدوا كاتب .. ده كتير والله العظيم ..

كان صاحبنا اللي ح يوصلني وشاييل الشنطة حاجة كده هجمه ..  
طول بعرض بصحة ما شاء الله حاجة تسعد أي كاتب .. أصل أنا ما  
كنتش متتصور إني واصل للأحجام دي .. مشي جنبي وأنا سامع دقات  
قلبه من فرحته .. وهو عمال يكلمني عن أعمالـي الفنية ومقالاتـي ..  
وحافظ تعبيرات ليـا بالحرف الواحد .. فجأة حسيـت إن العوامـيد  
نورـت وإن الضفـادع بتغـني .. وإن الكلـاب بتعـزف تشـيلـلو .. واني أنا  
وصاحـبـنا .. مشـماـشـين .. لاـ .. بنـرـقـصـ بالـيه ..

دماغـي كانت واصـلة بالـعاـفيـة تحتـ كـتفـه بـعـشـرينـ ستـى .. كانـ  
نفسـي أـكـلمـكـواـ علىـ درـاعـهـ إنـهاـ مـتـهـيـأـ .. دـهـ عـاـوزـ مـقـالـ لـوحـدهـ .. بـرـغمـ  
إـنـهـ درـاعـ .. مجـردـ درـاعـ .. إنـهاـ ياـ أـخـيـ فيـهـ كـلـ المـكـونـاتـ الفـسيـولـوجـيةـ  
لـكـائـنـ بـشـريـ مـسـتـقـلـ .. يـعـنـيـ دـهـ بـعـدـ الشـرـ يـعـنـيـ .. لـوـ فـقـدـ درـاعـهـ ..  
مـمـكـنـ درـاعـهـ يـبـأـهـ موـاطـنـ عـاـمـلـ .. لـهـ كـلـ الـحـقـوقـ الـلـيـ موـاطـنـ العـادـيـ ماـ  
بيـاخـدـهـاـشـ دـيـ ..

\* \* \*

وـإـحـنـاـ ماـشـينـ حـطـ درـاعـهـ عـلـىـ كـتـفـيـ .. كـأـنـهـ مـزـلـقـانـ قـطـرـ .. وـلـزـقـ  
فيـاـ بـكـلـ حـبـ .. الحـقـيقـةـ الرـاجـلـ كـانـ شـايـلـنـيـ منـ عـلـىـ الـأـرـضـ شـيلـ ..  
وـقـعـدـ يـكـلـمـنـيـ عـنـ كـتـابـاتـيـ .. بـكـلـ حـبـ وـبـكـلـ إـعـجـابـ وـبـكـلـ حـمـاسـ ..

وـدـهـ شـيـءـ أـسـعـدـنـيـ جـدـاـ ..

\* \* \*



المفروض إن المسافة بين أي اتنين بنى آدمين ماشيين جنب بعض  
تبأه على الأقل عشرة سنتى عشان المسام بتاعة الجلد مش أكتر .. دي  
المقاييس العالمية للمشي .. أمال قانون التحرش طلع ليه يعني ؟ ! إنما  
أخينا كان تقريباً شايل شنطتي بـإيده إليمين وشايلنى أنا بـإيده الشمال  
.. حبيت آجي شمال شوية عشان أبعد عنه بـتاع 5 سنتى .. نوع من  
الإحساس بالاستقلال وإن فيه هوا بيني وبين اللي جنبي .. راح  
حادف شمال هوه كمان وقرب أكتر .. بعدت كمان 5 سم .. راح  
مقربهم هوه في ثانية .. كأنى مسمار حديد وهوه مغناطيس .. قعدنا  
ماشيين بالشكل ده .. حاجات بتخبط في بعضها ..

كان نفسي أقول له .. أبوس إيدك .. إنت حادف جسمك كله عليا  
وأنا مش قدك .. وبعد شوية .. إنما إزاي ح أقول كلام زي ده وهو  
نازل مدح فيا وفي كتاباتي .. وفين .. في بلد أرياف .. وإمتى .. بالليل  
في الضلمة وعواميد البلد كلها مطفية مع صوت الضفادع وهو هوة  
الكلاب .. خلاص نتحمل شوية .. أهي اللوكاندة قربت .. قال لي  
وهو في قمة السعادة ..

- أظن قاعد شوية في بلدنا يا أستاذنا .

قلت له ...

- يوم واحد ..

راح ماسك فيا أكتر وقال لي ..



- والنبي ما ينفع .. على الأقل أقعدلك معانا أسبوع ولا اتنين ..  
ثلاثة بالله العظيم ما ح نسيبك .

من فرط انفعاله في الجملة اللي فاتت كان ابتدأ يطلع فوقي ويركب  
تقريباً على كتافي .. ابتديت أقاوم بكتفي .. وأزقه عشان يحس إنه ح  
يفطسني .. وهو ولا هنا .. أنا بازقه يمين وهو بيذق شمال .. بس طبعاً  
هو أقوى مني بكثير .. كأني متشعلق في عربية .. وعمالة تجرجر فيها ..  
وافتكرت أبو سويلم لما ربطوه في الحصان .. وقعدوا يسحلوه .. لا ..  
أنا كده باتسحل .. وهو مش سامعني .. مش سامع غير نفسه ..

- هو إنت فاكر إن إحنا ح نسيبك .. ده إحنا ما صدقنا شفناك ..  
وحياة النبي لتقعد معانا .. حتى نقوم بالواجب .

\* \* \*

نسيت أقولكموا إن إحنا بدأنا المشي أنا وهو وكنا على يمين  
الشارع .. دلوقتي إحنا ماشيين الناحية الثانية ..

- أما قريتلىك مرة بآه يا أستاذنا حته كلمة في الجورنال .. هزت  
البلد بصحيح ..

في الوقت ده أنا كنت عمال أديله كتف عشان يحل عنى وهو عمال  
يذقني ناحية الشمال وخلاص .. وصلنا لآخر الشمال .. ح أروح فين ..  
إحنا خلاص لازفين في البيوت .. ابتديت أخبط في الحيطان ..




والشبابيك وأبواب الدكاكين .. كأني مطلع إيدي من شباك قطر وهو  
ماشي .. اتبهدلت آخر بهدلة .. وكوعي اتجلط من كتر ما اتحك في  
الحيط وهدومي كلها اتلت جير .. طيب إحنا سايدين الشارع كله  
وزانقين نفسنا هنا ليه بس؟! يا حبيبي .. يا أغلى قارئ عندي أنا مقدر  
إعجباك ارحمني أبوس إيدك .. حاروح فين بعد كده .. وشوية  
ولقيت على شمالي فتحة .. مدخل بيت جالي من السما .. رحت رامي  
جتنى جوه البيت .. راح داخل ورايا ولزق فيها وقال لي ..

- أسلوبك .. أسلوب ما حصلش ..

- شكرًا .. ياريت أسلوبك إنت كمان يبأه كويس هي فين  
اللوكاندة؟!

دخلنا بأه على سور أسلام شايكه .. حسيت باللي ممكن يحصل  
لي .. وقفت .. ودينبي ما أنا ماشي .. العمر مش بعزقة .. ح يدينبي  
واحدة شمال من بتوعه أدخل في سور .. أباء انتهيت ..

لكن .. أما أنا عبيط صحيح!! إزاي ما خدتش بالى؟! الراجل  
مسكين يا حول الله .. الظاهر بيحذف شمال .. فيه ناس كده تلاقيها  
ماشية بتحذف شمال .. ما الحل بسيط .. لا .. مش وقته ظبط زوايا ..  
بكل سهولة آجي أنا وأباء على يمينه .. الراجل ما غلطش .. أنا اللي  
ماشي غلط .. يبأه أنا آجي على يمينه وأسيبه هو يحذف شمال زي ما هو  
عاوز .. والله دخل في سور اللي فيه أسلام شايكه يبأه عمره كده ..



رحت مفلوت منه ولاقف وجاي على يمينه .. لقيت الشارع كله  
فاضي جنبي والدنيا براح .. وزيادة في الحرية .. رحت معدني الشارع  
وماشي على الرصيف الثاني .. يااااه .. أخيراً أخذت نفسي ..

ولقيته جاي ورايا طبعاً .. مش إشكال .. ما دام يحذف شمال ..  
أباء أنا ماشى صح .. راح حاطط الشنطة في إيده الشمال ومنزل دراعه  
إليمين على كتفي والوضع اتعكس .. وبدأ بأه .. يحذف يمين .. وزي  
ما مسحنا بهدومنا بيوت البلد اللي على الشمال بالمللي حصل ده في  
البيوت اللي على اليمين ..

ولقيت على اليمين قدامي .. حفرة .. الظاهر بيت اتهد وح يبنوه  
وحافرين أساسات وجاتني فكرة خبيثة قوي .. وإحنا داخلين ع  
الحفرة .. وقبل ما نوصل لها بخطوة أقوم لافف بسرعة وجاي شماليه ..  
وهو بأه بقوة الدفع والقصور الذاتي ربنا يكرمه بأه .. وفي نفس  
اللحظة اللي أنا لفيت فيها .. كان هو بيلف بنفس السرعة .. كان اتعلم  
بأه من حكاية السور وأخذ خبرة .. خلاص تقريباً أنا وهو بأينا تواءم  
ملتصقة ..

فكرت أسييه واطلع أجري .. بس الشنطة معاه .. ولو جرى ورايا  
ما أضمنش اللي حيحصل ..

- هيـهـ فيـنـ اللـوكـانـدـةـ ؟ ! أنا فـرـهـدتـ أـبـوـسـ رـجـلـكـ !

- أـهـوـهـ آـدـيـنـاـ وـصـلـنـاـ يـاـ أـسـتـاذـ يـوـسـفـ .. مـعـلـشـ بـلـدـنـاـ مـشـ قـدـ المـقامـ .

- إنت رايح فين ؟ ! إحنا مش وصلنا !

- يعني معقوله أسيبك ع الباب .. مش لما أطممن عليك ..

وقد يزقني لحد ما وصلنا الرئيسشن .. وبعدين على السلم لحد باب الأوضة .. دخلت الأوضة وإترميت على السرير .. الزرقان والتسخات اللي في جسمي لو تشوفوها تقولوا دلله خارج من علقة موت .. بالنسبة للهدوم خلاص ما عدتش تنفع خالص .. اقطعت والبوية اللي فيها لا يمكن ح تطلع ..

قمت الصبح .. ميت من التعب عشان الحق الندوة .. وعلى باب اللوكاندة لقيته في وشي ..

أول ما شافني راح لاقطني زي المغناطيس .. ومنزل المزلقان على كتفي .. وقال لي ...

- ثلاثة بالله العظيم ما أسيبك .. دي الندوة هنا يادوب ربع ساعة  
شي .. ويا سيدى المرة دي حبائك جاين يسلمو عليك وح ييجوا  
عاك .. تعالى يا علوان .. يا جاد الله .. يا سليمان ..

ولقيت أربع تيران جاية عليا جري .. فاتحين دراعاتهم .. وكأنهم  
داخلين معركة حربية ولقيت أربع مزلقانات نازلين على كتفي .

- يا أهلاً يا أستاذ يوسف .. نورت البلد يا أستاذ يوسف .. خطوة

عزيزة يا أستاذ يوسف ...

\*\*\*

الكلام ده حصل من أربع سنين ورقبتي ملووحة لحد اللحظة اللي  
باكلمكوا فيها دي .. ومن يومها وأنا كمان بآيت باحذف شمال وكتير  
قوى باسرح وأنا ماشي ألاقي نفسي بأحك في الحيطان .. وأنا الوحيد  
في العالم اللي كم القميص بتاعي بيتنحل قبل الياقة ..

فيه حاجة أخيرة ما كنتش ناوي أقوها لأنى مكسوف بصراحة .. لما  
روحنا الندوة .. صاحبنا اللي بيحذف شمال هو اللي طلع يقدمني .. ما  
أنا داخل في وسط الزحمة متتعلق في دراعه غصب عنى .. وقف  
صاحبنا على المنصه وقال ..

- مع الأديب اللي البلد كلها بتحبه .. اللي أفلامه كلها علامات في  
السينما المصرية .. مع أستاذنا وحبيينا .. الكاتب المبدع .. يوسف  
السباعى !!!

مدير الندوة قال له في ودنه ..

- يوسف معاطي .. اسمه يوسف معاطي ..

راح صاحبنا باصص لي وعنده كلها شر ..

- معاطي !! معاطي إزاي !! هو مش الأستاذ يوسف  
السباعي ؟!.. أمال جايينه الندوة يهبووا بيه إيه ؟!

طيب بذمتكموا .. لو ما قولتش كلمة أبيحة في موقف زي ده ..

أمال تتقاول إمته بس ؟!!